




315



范文正公集


四


Inches 1 2 3 4 5 6 7 8

Centimetres 1 2 3 4 5 6 7 8 9 10 11 12 13 14 15 16 17 18 19

TIFFEN Color Control Patches © The Tiffen Company, 2007

Blue Cyan Green Yellow Red Magenta White 3/Color Black





范文正公集卷第十四

後學時兆文校正

後學黃姬水校正

後學李鳳翔校正

十五世孫啓乂同校

十六世孫惟元同校

太府少卿知處州事孫公墓表

論者曰春秋無賢臣罪其不尊王室也噫春秋二百四十年天地五行之秀生生不息何嘗無賢乎當東周之微不能用賢以復張文武之功故四方英才皆見屈於諸侯霸者之爲而王道不興與無賢同故論者傷之甚

矣公諱鶚字齊賢富春人也按舊誌公以奇文遠策見吳武肅王署越州大都督府文學歷郡縣幕府改臺憲爲郎官判鹽鐵院持禮入貢授少監終于太府少監領縉雲郡享年八十葬于會稽之南山今山陽守沔即公之曾孫也在御史府無所迴避有聲朝廷近過閭里掃墳墓求故老索遺文得太府之清芬訪余郡齋以道之旣而歎曰唐季海內支裂卿材國士不爲時王之用者民鮮得而稱焉皇朝以來士君子工一詞明一經無遠近直趨天王之庭爲邦家光吾搢紳生宜樂斯時寶斯時則深於春秋者無所譏焉困連惜太府公竒文遠策而終於霸臣丁彼時也豈徒一人而已乎故弔而表之

鄂郊友人王君墓表

五行之秀見乎人有清而賢有蔽而愚五行之數著乎命或修而壽或速而夭顏子其猶病諸吾友人王君賢而夭之其不幸矣夫君諱鎬字周翰其先澶淵人也曾祖鼎邢臺之督郵祖楷尚書兵部員外郎考袞太子右贊善大夫妣秦氏封太原縣君贊善公慷慨有英氣善爲唐律詩歷著作佐郎通判彭州會太守不法憤而辱之失官居長安中與豪士遊縱飲浩歌有嵇阮之風人特駭之公不安其高復起家就祿得請監終南山上清太平宮從吏隱也時祥符紀號之初載某薄遊至止及公之門因與君交執復得二道士汝南周德寶臨海屈元應者蚤暮過從周精於篆屈深於易且皆善琴君常戴小冠衣白紵跨白驢相與嘯傲於鄂杜之間開樽鳴

絃或醉或歌未嘗有榮利之語一日會君之別墅當圭
峯之下山姿秀整雲意閑暇紫翠萬疊橫絕天表及月
高露下群動一息有笛聲自西南依山而起上拂寥漢
下滿林壑清風自發長煙不生時也天地人物洒然在
冰壺之中客大異之君曰此一書生既老且貧每風月
之夕則操長笛奏數曲而罷凡四十年矣嗟乎隱君子
之樂也豈待乎外哉暨予東歸長白山以親之故就祿
養者僅十五秋君猶隱而未出今殿中丞致仕母君隨
居鄠郊善談名理見君之賢而語之曰子美田百頃枕
琴藉書釀醇酒養靈藥優游雲泉踰二十年人生此世
中安得獨善自樂如此之久耶不若俯就鄉老書少勞
于人間又長安秀造皆推引之君不得已天聖四年秋

起冠京兆之薦明年春官氏較天下之士第君于甲等
忽焉搆疾以三月九日不起于京師之建隆觀時周道
士在焉親視藥食而至于終乃齋其柩行哭道中歸于
鄠郊又數年予倅河中府因王事至長安傳舍中會周
道士夜話平昔及君之始末道士涕泗交下終夕不止
君善與人交也如此又十年予經畧西事遇君之長子
以葬期來告嗚呼君幼而奇敏能歌詩筆札有聲于關
中長安人惟呼小秀才長而有文著書樂道不願榮祿
有肥遁之節後感母君之言僣俛一進遽以不壽妻譙
氏生子五人長曰規謹厚克家奉父母之喪藏于鄠縣
某山某原禮也次曰慨景祐元年登明經第除臨晉主
簿而亡次曰覽曰觀曰觀尚幼俱嗣其業二女適孫周

道早卒噫予與君別三十七載風波南北區區百狀今
茲方面賓客滿坐鍾鼓在廷白髮憂邊對酒鮮樂豈如
圭峯月下倚高松聽長笛忘天下萬物之際乎追念故
人乃揭石而表之書曰有君子焉生兮雲山葬兮雲山
始終不垢兮其清而賢

龍圖閣直學士工部郎中段君墓表

皇祐二年春某月日葬故龍圖閣直學士段君于陳州
某縣某鄉之原君諱少連字希逸開封人也曾祖諱知
遇祖諱驥隱于五代父諱子昂端拱中登進士第終于
陳州錄事叅軍累贈吏部郎中母夫人樂氏追封福昌
縣太君君幼孤好學大中祥符七年秋登服勤詞學科
釋褐試秘書省校書郎知鄂州崇陽縣有治狀改權杭

州觀察判官時樞密直學士李公及領餘杭郡當世清
德於人少許可大愛君之才與本道轉運使薦之改著
作佐郎知亳州蒙城縣移雅州名山縣還改秘書丞知
發州金華縣未行除審刑院詳議官執法至平搢紳多
之張文懿罷相知江寧府辟君通判府事還授御史臺
推直官改太常博士時章獻太后聽朝君與知雜御史
曹修古等上言外戚劉從德家恩幸太過臺隸輩皆得
祿仕責授秘書丞監漣水軍酒稅務復太常博士通判
天雄軍上臨軒親政擢拜殿中侍御史尋除開封府判
官改刑部員外郎直集賢院充三司度支判官使契丹
國還為兩浙轉運使君以二浙財賦為天下之最孜孜
利病無弊不革朝廷獎之進兵部員外郎充職改淮南

轉運使兼發運司事移陝西轉運使奏劾判陝府駙馬都尉同平章事柴崇慶不法朝議直之俄命以本官兼御史知雜踰月除三司度支副使定襄地震壞閭舍墜人盈萬數天子怵然命君爲河東安撫使君恤殘民無一不至遷工部郎中充天章閣待制知廣州康定初西戎叛兵交塞下近塞藩牧實難其任朝廷以君爲龍圖閣直學士知涇州未行感疾以寶元二年八月初四日終于廣州之黃堂年四十六娶樂氏封京兆郡君生三男俱幼亡五女長適張氏次適孫氏次適譚氏次適明氏次適張氏君風神秀特人皆望而欽之臨事無大小無難易決發如流明而不苟和而不隨在御史府無所迴避謫去踰年及還又與孔中丞道輔等伏閣論事見

端人之風焉三爲轉運使特有風采善人君子皆得信
用而推擢之小人則畏而少過君在南海予方經略陝
西嘗薦君可仕邊要朝廷纔有涇州之命而君不起搢
紳先生咸嗟惜焉予知君之深者故表其墓云

希逸之生神粹而明朝端正色天下公聲顏子非壽清
德自久伯道何嗣令名爲後表墓以文希逸不朽

贈大理寺丞蔡君墓表

經曰君子之道闇然而日章嘗試觀之士果有文與行
不必據高享大而後顯雖林壑之幽逝而不泯者蓋有
稱焉君諱元卿字某其先洛陽人祖諱某爲萊之膠水
今有惠愛君官九載不得去旣終邑人留葬之子孫遂
家焉父諱某克已好學以疾不仕君幼不爲戲長而好

學一日嘆曰男子生而有四方之志吾從事於文豈啻身環堵而能通天下之志乎乃軒然遠游至江西胡氏之義學與群士居非禮不由非道不談君子願交焉五年業成復歸于齊鄉老請薦之時方尚雕蟲技君以好古不合于有司退居淄州郡之北郊有田數十頃而衣食之以貧爲樂未嘗屈于人有豪士至門願輸錢五十萬請爲陶朱之事以肥其家君謝之曰吾伏臘之餘尚可爲酒醴詠歌之音足以悅情性吾之仁義不得施于生民忍以貨殖而取之乎豪士慙而引去君退於斯終於斯享年四十七君體貌魁梧偉其衣冠人皆望而畏之而性本慈孝故叅知政事文忠公視君諸父也君親愛之過于已子每得文忠所著則喜盈顏面示于識者

曰起吾家者耶君娶故駕部員外郎王允已之女贈某縣君以孝和聞生四子曰奕曰稟曰亶曰交皆由文忠廕補報君之德也奕早終于乾寧主簿稟旣仕而學再舉進士出身夙夜刻志富于學問嘗應賢良方正科雖失于有司以是著聞於時至監察御史而終君與夫人因稟叙郊祀恩俱被贈告亶與交今並爲大理寺丞克孝于親奉君與夫人之喪以某年月日合葬于青州某縣某原禮也子孫游宦誠南北之人也故表而識之云君屈其身不屈其道愛及文忠文忠以報子孫迺昌相與爲孝墓而表之如立廟貌

權三司鹽鐵判官尚書兵部員外郎王君墓

表

君諱絲字敦素會稽人也晉右將軍逸少之後世居蕭山曾祖諱慶祖諱安皆不仕父諱宸有鄉曲之行好施與而里人喜之曰厥後其昌娶沈氏夫人而生君及君登朝累贈尚書屯田員外郎夫人追封德清縣太君後夫人謝氏追封會稽縣太君君幼稟親訓未嘗釋卷復游學京師大中祥符八年春擢進士第釋褐除興國軍司理叅軍精意獄事無不得其情前後劾重辟而昭雪者凡十一人郡中稱之神明秩滿除台州軍事判官州城據山病其少井君白州長一舍之外有泉焉請陶土爲筒導入于城復五里一穴以濟行路之渴于今人賴之移潮州軍事判官秩滿權杭州觀察推官丁父母憂服除赴集吏部選充開封府兵曹叅軍歲餘大理寺舉

爲詳斷官改本寺丞凡奏獄之疑者必持寬典全活甚衆改殿中丞故龍圖段學士少連時爲兩浙轉運使舉君撥發本路漕船廼革其弊本大增上供之數以考績聞改太常博士通判衢州州人子弟多習詩書而未有學校士望缺然而君募郡中高貴始建學舍其堂室僅百楹朝廷賜州學額又營資糧之具最於諸郡時金華郡守闕外臺假君領之衢之父老遮道于境上謂婺民曰我州一鑑何奪之爲有詣外臺乞還者婺人薛惟簡先有寃狀父徒子黥君雪除之其家德君以紫檀肖其象而祠之故翰林聶學士冠鄉應詔舉知深州不就改屯田員外郎通判袁州故翰林葉學士清臣舉拜殿中侍御史慶曆中湖南蠻人亂攻劫郡縣言事者或請夷

滅或議招納歲時未決生民甚苦之朝廷選御史往究其事以君爲湖南安撫至則察訪利病而前之主者立重賞以誅蠻人一級萬錢士卒貪之徃徃害樵餉之人以爲功君下令曰得賊之首者必指其鬪地以爲質其可擒者當生致之自是無枉戮者君居軍中凡十月戎服葛屨與士卒同惟石硤鈴景二洞聚黨數千君促官軍力破之斬首數百級招安三千人餘皆竄匿英連詔間自是衰息朝廷槩君之勞遷侍御史賜金紫充廣南東路轉運按察使兼本路安撫提舉市舶司凡蕃貨之來十稅其一必擇諸精者夷人苦之公令精羸兼取夷人大悅謂之曰金珠御史意貴之也時交趾有變朝廷命君經度而廣州當交趾之衝無城守備君議陶埴爲

城造大艦十數日習水戰以待其來彼不復動歲餘君以瘴疾求領小郡遷兵部員外郎知通州通人歲苦海潮流亡者衆君作長堤以捍之復民田業量其肥瘠奏免五年至十年之租朝廷召權三司鹽鐵判官以皇祐元年四月疾終于京師享年六十一二年三月十日歸葬于蕭山之先域禮也君娶裴氏生一女再娶杜氏生四男一女其子霽登進士第震試秘書省校書郎露三班借職需修進士業女文慧適泉州永春主簿陸琪文淑適皇祐元年進士第一人馮京予於君同年之交也見君苦志清節不渝於素稱薦者皆當世名臣朝廷一用之而克樹風績惜哉位未大道未顯而終焉其命矣夫故表其墓云

稽山之陰右軍之後生此淑人終身無咎既及于民復歸於神葬之家山雲氣氤氳宜昌乎子孫


書碑陰

書環州馬嶺鎮夫子廟碑陰

慶曆二年春正月予領環慶之師出按邊部過馬嶺鎮四望族落皆鎮之屬蒐而戍城之中有夫子廟貌觀其記石乃故兵馬監押殿直贈某官張公蘊之所建也已而思之昔咸平二年冬契丹以舉國之衆入高陽關縱橫大掠南至于河乘冰之堅侵于淄齊時河南州郡未嘗治城且無戰卒四郊之民驅戮向盡城中太懼公方監押與刺史議其事刺史暨官屬州人咸欲棄城奔于南山公按劔作色曰柰何去城隍委府庫大衆一潰更

相勦奪彼狄未至吾民已殘矣刺史果出我當殺之以徇繇是衆無敢動公乃呼民登城夙夜以守數日狄退而州人相賀曰向非張公英識獨斷則我輩父母妻子魚肉於人矣朝廷賞不及公人咸嗟咨公生二子長曰揆今爲度支員外郎直史館荆王府記室叅軍次曰揆今爲秘書丞通判京兆府事並以文學節行自樹風采搢紳先生稱之議者謂公有陰德於人宜其有後焉予幼居淄川郡又與記室爲同年生稔聞公之事及觀馬嶺之跡雖極塞窮壘猶復立聖人之祠以尚風教乃知張公信道有素固能訓子義方昌厥世而大其門蓋未可量也豈止陰德之助哉故書之

范文正公集卷第十四



范文正公集卷第十五

代胡侍郎乞朝見表

臣某言今日奉勅就差臣知杭州仍放朝辭取便路發赴本任者祇膺寵命伏積震兢臣其中謝竊以寧海鉅邦生聚十萬牧守之重豈臣克堪矧爲晝繡之行再領宵衣之寄始終極幸進退甚榮臣方理輕裝即趨便道敢有再三之瀆庶傾萬一之誠竊念臣才不逮人遭逢有素東帶從事四十餘年荷三朝之獎知歷二省之清要職叅仙殿位亞秋卿祿賞被于子孫名級顯於中外報國無狀殺身何成今復還父母之鄉邦逼桑榆之晷刻解冠告老決在此行久事朝廷乍越江海無復瞻望咫尺對敎清光雖小人之心固多懷土而疲馬之志

寧莫戀軒臣欲於京城就兩浙舟船載家赴任伏望聖
慈暫許臣入謝雲天少叙平生之感退歸鄉里永爲萬
足之心賴君父之推恩庶人臣之畢願干冒宸極臣無
任云云

睦州謝上表

臣某言臣昨奉勅差知睦州軍州事已到任交割勾當
者獻言罪大輒効命於鴻毛有過恩寬迴迴光於白日
事君無遠爲郡甚榮臣某中謝恭惟皇帝陛下天德清
明海度淵默撫群龍而宅吉念六馬而懷驚臨軒以來
仄席不暇思啓心沃心之道獎危言危行之臣萬寓咸
歡九門無壅臣腐儒多昧立誠本孤謂古人之道可行
謂明主之恩必報而况首膺聖選擢預諫司時招折足

之憂介立犯顏之地當念補過豈堪循默昨聞中宮搖
動外議喧騰以禁庭德教之尊非小故可廢以宗廟祭
祀之主非大過不移初傳入道之言則臣遽上封章乞
寢誕告次聞降妃之說則臣相率伏閣冀回上心議方
變更言亦翻覆臣非不知逆龍鱗者掇壘粉之患忤天
威者負雷霆之誅理或當言死無所避蓋以前古廢后
之朝未嘗致福漢武帝以巫蠱事起遽廢陳后宮中殺
戮三百餘人後及巫蠱之災迺及儲貳至宣帝時有霍
光妻者殺許后而立其女霍氏之豐遽爲赤族又成帝
廢許后呪詛之罪乃立飛鸞姊妹妬甚於前六宮嗣息
盡爲屠害至哀帝時理之即皆自殺西漢之祚由此傾
微魏文帝寵立郭妃譖殺甄后被髮塞口而葬終有反

報之殃後周以虜庭不典累后爲尼危辱之朝不復可
法唐高宗以王皇后無子而廢武昭儀有子而立旣而
摧毀宗室成竊號之妖是皆寵衰則易搖寵深則易立
後來之禍一一不善臣慮及幾微詞乃切直乞存皇后
位號安於別宮暫絕朝請選有年德夫人數貢朝夕勸
導左右輔翼俟其遷悔復于宮闈杜中外覬望之心全
聖明終始之德且黔首億萬戴陛下如天皇族千百倚
陛下如山莫不雖休勿休日慎一日外采納於五諫內
彌縫於萬機而況有犯無隱人臣之常面折庭諍國朝
之盛有闕即補何用不臧然後上下同心致君親如堯
舜中外有道躋民俗於義皇將安可久之基必杜未然
之釁上方虛受下敢曲從旣竭一心豈逃三黜伏蒙陛

下皇明委照洪覆兼包贖以嚴誅授以優寄郡部雖小
風土未殊靜臨水木之華甘處江湖之上但以肺疾繇
舊藥術鮮功喘息奔衝精意牢落惟賴高明之鑒不投
遐遠之方抱疾于茲爲醫尚可苟天命之勿損實聖造
之無窮樂道忘憂雅對江山之助含忠履潔敢移金石
之心仰戴生成臣無任云云

蘇州謝就除禮部員外郎充天章閣待制表
臣某言伏蒙聖恩特授臣前件官充職者渙渥自天震
惶無地改中臺之華序進內閣之清班盡出高明殊登
祕近臣中謝竊念臣發自頽巷賓于舜門一第爲榮四
方無效爰自書林預選桂籍升華耻汨沒以懷安或感
激而論事惟慕古人之節詎希英主之知伏惟 皇帝

陛下稟帝堯之聰明加漢高之豁達坦聖懷而虛受期
鴻化以咸孚念三聖之艱難而成丕業求七人之蹇諤
以補大猷臣獨愧非才首當清問危言多犯孤立自持
斧鉞居前雷霆在上敢避樞機之禍終乖藥石之良陛
下日月垂光江海敦量恕其萬死假之一麾望已絕於
青雲咎未更於鴻霈俄易藩宣之寄寧分旰食之憂忽
降綸章荐加寵數而况闢圖書之府切處於深嚴踐雲
龍之庭當備千顧間非名儒而不稱豈曲士之能堪矧
外修景行進退惟道尊聖賢視履之方始終一心副君
父育材之造臣無任云云

饒州謝上表

臣某言昨奉制命落天章閣待制守本官差知饒州已
到任禮上訖狂愚之誠進多冒死仁聖之造退亦推恩
守土非輕報天無所臣中謝竊念臣出自畎畝階于搢
紳驟升天閣之游親委玉畿之政臣至孤難立屢請弗
諧眷寵既隆補報宜異必將危墜猶或建明處事未精
發言多率智者千慮而有失愚臣一心而豈周情雖匪
他罪實由已然而有犯無隱惟上則知許國忘家亦臣
自信伏蒙 皇帝陛下惟天爲量無大不容與日垂光
何微弗照止削內朝之職仍分外補之符當死而生自
勞以逸君恩彌重臣命愈輕敢不動靜三思始終一志
此而爲郡陳優優布政之方必也入朝增蹇蹇匪躬之
節庶從師訓無負天心瞻望闕庭臣無任

潤州謝上表

臣某言奉勅移知潤州已赴禮上者幽遠之誠未嘗聞
達高明之鑒俄復照臨臣中謝伏念臣起家孤平蒙上
獎拔置於清近之列授以浩穰之權聖惟知人臣則辱
命徒竭誠而報國弗銜口以安身言涉大臣議當深典
可無退省抑有所聞汲黯漢之直臣管疏公孫之短裴
度唐之名相亦陳元稹之非斯實忠良豈無讒毀臣聞
孔子曰天下有道政不在大夫前代國家或進退群臣
聽決大事若出於君上則中外自無朋黨左右皆爲腹
心若委於臣下則威福集於私門禍釁積於王室故三
桓興而魯弊六卿作而晉分徃古興亡鮮莫由此孔子
之論昭昭不誣是以君道宜疆臣道宜弱四瀆雖大不

可受百川之歸五星雖明不可代太陽之照臣按太易
之義坤者柔順之卦臣之象也而有履霜堅冰之防以
其陰不可長也豐者光大之卦君之象也而有日中見
斗之戒以其明不可微也臣考茲前訓慮於未萌當危
言危行之秋有寢昌寢微之說謂大臣久次在進退而
得宜謂王者萬機必躬親而無倦揔擘綱柄博延俊髦
議治亂之本根求祖宗之故事政慘舒而自我物榮悴
而如天人心不在於權門時論盡歸於公道朝廷惟一
宗廟乃長臣之所言殊未盡意重煩上聽再貶遠方削
天閣之班資奪神州之寄任重江險惡盡室顛危人皆
爲之寒心臣獨安於苦節蕭望之口陳災異蓋無負於
本朝公子牟身處江湖徒不忘於魏闕未知死所敢望

生還伏蒙 陛下九日垂光八風迴力察臣有犬馬之志恕臣無塵露之勞特出聖衷稍遷便郡茁如行葦保於勿踐之仁鑑若鳴桐脫彼在焚之患敢不長懷霜潔至効葵傾進則持堅正之方冒雷霆而不變退則守恬虛之趣淪草澤以志憂上副聖知下逃群責臣無任云云

延州謝上表

臣某言伏望勅命就差臣兼知延州軍州事已到任交割管勾訖討伐之秋委寄方重豈緊懦品可副聖憂臣中謝竊以延水極邊東夏雄屏控黠虜之衝要歷大臣之鎮臨范廷召出師於塞門向敏中移節於京兆斯爲劇任曷在匪人况經侵軼之虞彌藉緝綏之政宿兵旣盛爲地可知臣職貳統戎志存殄寇所宜盡瘁敢昧請

行自薦老成固慙於漢將誓平此賊詎擬於唐賢伏蒙皇帝陛下曲徇微忠亟頒成命寬其無狀用之弗疑臣夙夜敢寧奔馳罔暇刻時莅事翌日興師庶牽制於戎心仍掩襲於邊路大軍已出中使聿臨不謂孱謀偶符睿筭所期克勝少慰焦勞重念百姓屢驚體當招撫五兵久戢務在訓齊如治亂繩必期於耐事先除害馬亦假於行權仰賴聖威即紓邊患臣無任云云

謝降官知耀州表

臣某言蒙恩降授臣尚書戶部員外郎依前充龍圖閣直學士知耀州者實負大尤尚從寬宥雲天之覆頂踵何酬臣中謝竊念臣才本迂踈識非機敏屢由狂率自取貶放朝廷以邊有擾動是使愚使過之秋微臣以國

有急難當忘家忘身之報自膺寄委罔敢遜避而力小
任重智小謀大勞心已竭處事逾乖苟利國家不恤典
憲宜及於禍以貽厥羞伏蒙 皇帝陛下日月照微天
地包廣謂千慮之智猶有一失萬物之材固無全用軫
茲孤弱播于生造削其官足使明大戒存其職足使思
後圖臣敢不更勵疲駑愈加修省庶陳纖芥之効上荅
高明之私臣無任 云云

耀州謝上表

臣某言伏奉制命降授戶部員外郎依前充職知耀州
已到任禮上訖雷霆之威足加死責天地之造曲致生
全臣中謝竊念臣運偶文明世專儒素靡學孫吳之法
駟道相文之事國家以西陲搔動之際起臣貶所特加

獎用臣自知甚明豈堪其任但國家之急不敢不行自
兼守延安莫遑寢食城寨未謹兵馬未精日有事宜處
置不暇而復虞內應之患發於邊城或反間之言行於
中國百憂具在數月于茲而方修完諸柵訓齊六將相
山川利器械為將來之大備不幸昨者高延德來自賊
庭求通中國之好其僭偽之稱即未削去臣以朝廷方
命入討豈以未順之款送于闕下此不可一也或送于
闕下請朝廷處置又恐荅以詔旨則降禮大甚若屏而
不荅則阻絕來意此不可二也兼慮詐為款好以殆諸
路之兵苟輕信而納之賊為得計此不可三也又寶元
三年正月八日曾有宣旨今後賊界差人齎到文字如
依前僭偽立便發遣出界不得收接臣所以却令高延

德迴去仍諭與本人須候禮意遜順方可聞于朝廷亦已一面密奏臣又別奉朝旨依臣所奏留鄜延一路未加討伐容臣示以恩意歲時之間或可招納臣方令韓周守在邊上探伺彼或有進奉之意即遣深入曉諭適會高延德到來堅請使介同行況奉朝旨許臣示以恩意乃遣韓周等送高延德過界以系其意或未稟承則於臣爲耻於朝廷無損及韓周等迴且言初入界時見迎接之人叩頭爲賀無何前行兩程便聞任福等有山外之敗去人沮氣無以爲辭賊乃益驕勢使然矣其迴來文字臣始不敢開封便欲進上都鈐轄張亢懇言曾有朝旨若得外界章表須先開視及僭僞文字應有辭涉悖慢者並須隨處焚毀勿使騰布臣相度事機誠合

如此章表尚令先開況是與臣文字遂同張亢開封視之見其挾山外事後辭頗驕易亦有怨尤與賀九言齋來文字意度頗同非戎狄之能言皆漢家叛人所爲枝葉之辭也恐上黷聖聰或傳聞于外爲輕薄輩增飾而談有損無益臣尋便焚毀只存書後所求通好之言及韓周等別有劄到邀求數事並已納赴樞密院今於涇原路取得寶元二年七月十四日聖旨劄子一道並如張亢之言其所來文字果合焚毀則臣前之措置皆應得朝廷處分唐相李德裕與將帥王宰書爲游奕將收得劉稹章表悖慢無禮不便毀除令向後得賊中文字所在焚之亦與今來意合其劄到數事內一事如臣所諭取單于可汗故事欲稱兀卒以避中朝之號此大事

稍順餘皆可與損益儻朝廷欲雪邊將之耻當振皇威
大加討伐亦繫朝廷熟議必持重緩圖之或朝廷欲息
生民之弊屈一介之使重論利害苟能聽服亦天下之
幸也臣前所措置於此二道並未有妨然以臣之愚處
茲寄任豈得無咎何敢自欺伏蒙 皇帝陛下至仁廣
度不欲彰臣子之惡特因此量行薄責斯天之造也臣
之幸也臣敢不夙夜思省進退揚厲犬馬有志曾未施
爲日月無私尚茲臨照臣無任 云云

乞小郡表

臣某言臣聞先民有言曰陳力就列不能者止臣下之
通規也進人以禮君親之盛德也臣仰逢明聖俯念拙
艱撫此病軀敢期生造臣中謝竊念臣前在饒州日因

學行氣而有差失遽得眩轉之疾對賓客忽倒不知人
事尋醫救得退自後久坐則頭運多務則心煩昨在延
安數曾發動戎事方急雖死難言及降罷之後猶乞專
領邊城蓋欲竭心豈敢避事無何赴任耀州以炎熱之
期歷涉山險舊疾遂作近日頗加頭目昏沉食物減少
舉動無力勉彊稍難見於永興軍請醫官看治次其本
州公事權交割通判發遣臣賦性本蒙處心至狹國家
擢於清要有遇事輒發之尤寄以重難無思患預防之
智言必取悔舉則敗官未踰數年實經三黜頻招物議
屢贖宸聰費天力之主張由臣命之奇蹇矧念抱病何
可貪榮處於善藩已多優幸帶茲近職深未遑寧伏望
皇帝陛下推至仁之恩施曲成之化念其理歷出自遭


逢特發聖衷不循朝例以臣學士之職改一庶官或且在當郡或於隨郢均汝之間守一小州庶獲安靜尚圖痊瘡雖貪冒微祿詎逃病者之譏而遜避清班少緩有司之責儻形骸未頓藥餌有功則當再就驅馳上酬亭育臣無任云云

代胡侍郎奏乞餘杭州學名額表

竊以三代右文四郊立學尊嚴師道教育賢材被服禮樂之風準繩仁義之行功磨國器標準人倫式致用於薦紳乃助成於聲教俊造以之富盛基業由是絛昌至于唐家中外建學文物之盛三代比隆國家徇鐸敷文舞干布化四方庠序比之而興萬國英翹拳拳以勸臣伏見餘杭郡素爲善地蔚有秀民宜恢正始之風丕變

輕揚之俗前知州李詔在任日重修宣聖廟建置學舍數十厦面勢顯敞允爲儒宮足容絃誦之流迥處雲山之勝臣自出守此郡延見諸生據衆狀舉請曾到御前進士楊希堂領文會有二十餘人日課藝業其來不已所益居多臣欲乞朝廷依天雄軍江寧府特賜州學名額用明勸導庶獲修長歲時不隳方俗可厚顏閔德行遠侔洙泗之間唐虞文章廣及江湖之上臣無任祈天俟命激切屏營之至

范文正公集卷第十五



范文正公集卷第十六

讓觀察使第一表

臣某言馬遞降到誥勅各一道特授臣邠州管内觀察使仍依前邠寧環慶路馬步軍都部署兼經略招討安撫等使非常之命既出於絲綸未盡之誠敢逃於斧鉞臣中謝臣聞先王爵以尚德祿以報功諸侯之失德者降其爵諸侯之有功者增其祿此百代不易之典也臣又聞貴貴者為其近於君也漢遣御史繡衣持斧出按二千石唐御史之出節度使以軍禮見所以表朝廷之重也學士丞郎出則居廉察刺史之任入則復其位自五代之亂措置乖失廉察刺史之位遂為武官學士丞郎一出為之謂之換過入朝則不復其位故士大夫寧

甘薄祿而不樂換之者久矣況今用兵之際事繫安危今日之命理有利害臣儻默然而受一則失朝廷之重勢二則減議論之風采三則發將佐之怒四則鼓軍旅之怨五則取夷狄之輕六則貽國家之患何以言之臣與韓琦並命陝西初爲經略安撫副使次則分領秦慶二州兼本路都部署司兵馬公事次則進秩爲本路都部署兼領經略安撫招討等使皆以學士之職行都統之權是用內朝近臣出臨戎闡以節制諸將孰不以朝廷之勢而望風稟律臣輩亦以內朝之職每覩詔令之下或有非便必極力議論覆奏不已期於必正自以近臣當彌縫其闕而無嫌矣今一旦落內朝之職而補外帥前在左右丞諸行侍郎節度留後之上今降於知制

誥待制之下使居方榮劉興之下列以外官而行都統之權此則失朝廷之重勢一也又旣爲外帥則今而後朝廷詔令之出或不便於軍中或有害於邊事豈敢區別是非與朝廷抗論自非近臣無彌縫其闕之理縱降詔丁寧湏令奏覆而臣輩豈不鑒前代將帥驕亢之禍存國家內外指蹤之體此則減議論之風采二也臣又自至邊上常責將佐當圖實効上報國家勿樹虛聲妄求恩獎故得歲年以來所奏邊効稍稍得實不至矯誣臣方經制補葺以救邊防之闕而西賊猖熾枝葉愈大則發將佐之怒三也又臣聞自古將帥與士旅同其安樂則可共其憂患而爲國家之用故士未飲而不敢言

渴士未食而不敢言饑今邊兵請給粗供樵爨醋鹽之費食必麤糲經逾歲年不霑肉味至有軍行之時羸不勝甲棄而埋之負罪以逋未能遠去皆捕而斬之臣雖痛而不忍豈敢慢法或有危逼欲使此等之心同其憂患爲國家之用不亦難哉昔祿山之亂河北三十餘城俱歸於賊者非皆攻而下之由衆心無恩當未危之時勉以從事及旣危之後翻然改圖劫長吏以應賊皆此類也臣每思之則常寒心古之方侯獲其厚祿養敢死之士以備寇患今之戰士養有常廩賞有常格臣得千鍾之祿千金之賜豈敢私與死士哉徒聚之於家使彼目而銜之以待其釁爾臣恐此輩一日倉卒乘怒而發劫長吏以應賊不能爲國家之用而能爲國家之患矣

此則鼓軍旅之怨四也又臣聞內列三公九卿外分五侯九伯所以安天下威四夷也臣自到邊上其熟戶蕃部皆呼臣爲龍圖老子至於賊界亦傳而呼之且不測其品位之高下也今賊界沿邊小可首領並僞署觀察團練使之名臣若受茲新命使蕃部聞之適足取夷狄之輕五也臣謂國家此舉使四路首帥失朝廷之重勢減議論之風采發將佐之怨鼓軍旅之怨取夷狄之輕由斯以往必敗乃事寧不貽國家之後患哉此六者臣上爲國體而辭之也再念臣世專儒素遭逢盛時以文藝登科陛下擢於秘館處之諫司歷天章龍圖之職可謂清切矣寒士至此大逾本望儒者報國以言爲先如臣曩者不能練事効賈生慟哭長太息之說贖于聖聰

以中外共棄屢經貶放亦已塞朝廷之薄責矣然今之
狂士效唐人肆言朝市往往甚於臣者而朝廷容之直
以臣於無事之秋先爲之言故天下指之爲狂矣而臣
自追其咎未嘗怏怏此搢紳之所諒也前春延安之戰
主將不利大挫國威朝廷有使愚使過之議遂及於臣
逮臣至于延安竭心悉力而處置之間不合朝廷之意
既廢復用無所逃遁臣顛沛十載灰而又然者數四矣
臣自知子子惴惴非將相之才豈了大事但國家急難
之際邊鄙乏人臣以事君之心雖知屢困日勉一日俟
將帥得人臣即引退丘園詠歌太平雖多難之夫有全
歸之樂此臣之所期也臣粗守廉隅朝廷豈有貪夫畜
臣落近職而增厚祿將令長居邊鄙永謝丘園非臣之

所期也臣本有風眩之疾聞命以來心墮氣索不知其
涯緣臣夙夜乃事精爽已乏量臣之力豈堪武帥長爲
荷戈之事乎此臣下爲私心而辭之也伏望體天法道
欽文聰武聖神孝德皇帝陛下垂日月之明發於獨斷
追還新恩許存舊職則是以內朝近臣經略邊事節制
諸將其體重矣而況儒臣武士所習不同所志亦異臣
輩不願去清列而就廉察之厚祿者如方榮劉興輩必
不願減厚祿以就學士之清列矣如使四路之帥上失
其勢下撓其志沮喪不樂意衰神瘁則事有隳墮豈復
能振謀發策爲國家長城之倚哉恐非陛下推委使人
人盡心之意也一昨宰臣堅讓三公雖已行之命蒙陛
下特俞其請臣今冒犯天威爲國體而辭之者六爲私

心而辭之者一苟不獲命臣當繫身慶州之獄自効無功冒賞之咎又効違制不受之罪以聽于朝廷假使朝廷極怒臣得死於君父之命猶勝貪此厚祿敗名速禍死於寇亂之手此臣之所以知其退而不知進也惟天鑒處之臣無任云云

第二表

臣某言馬遞降到詔書一道伏蒙聖慈諭臣所除觀察使且從廩秩之優益慰戎行之望者祇膺寵異載被辱愚心戴雲天足臨淵谷臣中謝竊念臣器業無取誤荷聖知國有急難固宜自効臣奔走塞下首尾三年曾無寸功以稱上意伏蒙體天法道欽文聰武聖神孝德皇帝陛下曲敦寬宥未即嚴誅今又擢居廉察享千鍾之

厚祿加千金之重賜於臣何少哉臣固上表陳讓者蓋為國家未便何則落內朝之職改為外官使節制諸將頓失體勢又無功進祿發將佐之怒積貨于家鼓軍旅之怨況慶州與賊界相接其逐族首領管三五百人者便偽署觀察團練之名本司常時行移邊上文字及招安榜示若署臣新銜彼則相輕此皆未便之端也又四路文帥自來帶內朝之職而行節制凡百將佐無不稟服方且力修邊備堅禦賊鋒賴其協心將圖成効一旦遷改人情大惑知者謂去此近職改為外官非美也其不知者謂有何倚功加此厚祿非宜也經略使既無功遷改則經略副使豈得無望兼鈐轄都監等出入暴露衝冒矢石比臣處任尤更重難見此遷改必有不平之

意若朝廷不待有功例皆進秩則諸將驕墮誰復自奮
國家邊事爲之柰何此又未便之大也伏望陛下發於
獨斷追還此恩臣得帶內朝職名節制邊事其體且重
副使鈐轄都監等即無不平之意各思自奮以求功名
又得經略招討銜位與偽署蕃部之名不相交錯免生
輕易此事體大乞垂聖鑒特降中旨如不獲命臣當踐
言繫獄上請不敢逃罪臣亦知本朝李維陳堯咨俱自
學士換觀察使當時四方無事非領節制但享厚祿爲
優賢之命與今事體不同臣非罷陝西經略安撫副使
日便乞落職守員外郎知一小郡而朝廷不從今却堅
辭廉察之位請存學士之職者蓋居節制之任藉朝廷
之勢以重其體也且儒生後進換入武帥或居於上則

多憎憤必有怨言或處於下則多見抑亦無成功惟異
其品流隆其委注彼則望風懷畏靡敢不從此爲得其
體也况臣孤立明時無結託之跡遠居極塞非進用之
地如朝廷疑臣不就右職別懷過望即乞聖慈依楊偕
張存例特許解去邊任仍乞落學士之職換一刺史或
守郎官於隨郢間知一小郡臣死生幸甚死生幸甚非
領重寄固不敢借內朝之職矣如受命之日却有翻言
甘俟鼎鑊惟聖鑒裁之干犯天威臣無任云云

第三表

臣某言馬遞降到御前劄子伏奉聖旨以臣上表陳讓
就除邠州觀察使事當體深衷勿循小節前來成命即
宜祇受者天語重臨莫非敦獎臣心再剖合盡懇私臣

中謝臣聞虞舜以舍己從人而稱至德此聖人感人之要也又聞陳力就列不能者止此人臣事君之分也竊念臣世爲文吏拳拳素風國家以西事之急用臣過次俾預經略三年于茲進不能行討伐之威非勇也退不能宣懷柔之化非智也非智非勇豈主帥之材固當自効聽于有司豈期睿恩驟進寵祿臣退省無狀深所未安況臣前表所陳謂落內朝之職則失朝廷之重勢旣爲外帥則減議論之風采獨受寵名發將佐之怒積貨于私鼓軍旅之怨與僞署蕃部同其官號取夷狄之輕述斯以往必有敗事以貽國家之患此物情可見朝廷必已照之非臣之敢誣也況臣懦阨之質宿患風眩近加疾毒復多臯衄膚髮衰變精力減竭豈堪專爲武帥

以圖矢石之功此臣量力之所不能也明矣且如劉平本是文臣衆推忠勇尚不能將帥之任朝廷察臣之材能如劉平之武力乎昔唐用房瑄虛名將兵拒賊一戰而潰危困社稷此前人之明驗微臣之深戒也重念臣出處窮困憂思深遠民之疾苦物之情僞臣粗知之而天賦褊心遇事輒發故居其外則寡悔處於內則多咎臣自知非朝廷進用之器如未獲退則願久守一藩奉行條詔庶幾爲聖朝之循吏亦足託青史之末光垂於來代今以邊鄙方艱承乏於此禦寇之力賴諸將佐臣則日夜思省救其闕漏而已衆知儒臣固不責其勇力及改武帥則取笑於三軍其諸路有不辭者或當壯歲或負雄才非臣之所及也裴德輿張可久並命閣門使

一受一免朝廷各從其志斯有以見虞舜舍己從人足以感群下之心矣臣久荷聖知叨居近列何獨未獲其請臣竊自疑今邊上新有事宜已發走馬承受張翔赴闕敷奏本州全闕部署鈐轄臣未敢下獄待罪再瀝肝膽上冒斧鉞伏望體天法道欽文聰武聖神孝德皇帝陛下垂至明之察推廣生之造許臣依期帶內朝之職經畫邊方節制諸將小事行之大事言之爲朝廷之耳目其體甚重臣尚可力疾爲國盡心其武師之難寵祿之過臣敢不揆度固以死請干冒天憲臣無任云云

謝許讓觀察使守舊官表

臣某言准樞密院劄子奉聖旨令臣却守舊官者寵祿固辭涉邀君之大咎聖言惟允推舍己之至仁臣中謝

臣聞進入以禮退人以禮哲王之體也大讓如慢小讓如僞儒臣之行也上得其體足以寧家邦下與其行可以導風俗臣親逢盛美得不手之舞之足之蹈之與天下稱慶哉竊念臣少游庠序長登科級周旋孤宦了無聞達伏遇體天法道欽文聰武聖神孝德皇帝陛下金鑑臨御多士駿奔於千官百辟之中擢臣諫諍之列置臣圖書之府揚歷中外恩常異等自西陲用兵朝廷旰食遣臣經略邊事歲月無狀亦嘗得請示以招納之意期于平定而物議喧然禍在不測上賴日月垂照保全微生暨再委方面專此一路又無出奇之策惟知守禦而已日常自訟以待來者陛下潛發宸謀思欲崇諸路之寄例改廉車且從廩祿之優兼貴稱呼之重需然渥

澤被于弱質臣以今之觀察使列爲武帥書生何力可
堪此任幸以內朝之職爲國家心腹耳目權節制之任
其體任重不煩改作願迴寵異少寬憂慄三黜天聽義
不容誅伏蒙陛下念進人退人之禮察如慢如僞之情
特降俞旨許存舊秩臣且懼且喜不知所爲懼者有不
即從制之罪而尚屈爨典喜者以不奪稽古之志而復
被儒紳臣敢不竭力悉心夙宵乃職謹疆場之細事佇
千羽之大猷退作頌聲仰荅聖造臣無任 云云

謝傳宣表

臣某言入內侍省高班陳舜封至伏蒙聖慈傳宣爲
日近差除兩地臣僚未差除間已指揮中書劄記候將
來邊事稍寧詔御用在兩地非出擬議亦非臣僚奏舉

特出朕意宣諭卿知兼令臣密舉臣僚代臣邊任奏聞
聖言天意非臣敢當仰戴光靈伏增戰汗臣中謝竊念
臣素乏才策誤膺獎寄經制西事三年于茲曾微毫髮
之功方俟雷霆之罰伏蒙體天法道欽文聰武聖神孝
德皇帝陛下特降密旨許以重用豈茲無狀之跡可承
不次之命況羗戎素詐邊鄙多虞若以社稷之靈自然
嚮化則臣當自揆以請便安抱病之軀假一近郡靜臨
民政退保天年如朝廷未議解兵臣願奔走塞下再竭
心膂少贖過尤何敢輒舉他人代已邊任惟期自効上
答聖知臣無任 云云

讓樞密直學士右諫議大夫表

臣某言三班借職劉仲顏齋降官誥一通勅牒一道伏

望聖恩特授臣右諫議大夫充樞密直學士差遣依舊
者在物之情向榮必喜自天之命過寵則驚臣中謝竊
念臣齊魯諸生本無榮望素乏佐王之術豈期遇主之
知伏蒙皇帝陛下采自孤平擢于侍從無似之迹每玷
聖造前年以羗戎負德官軍失利朝廷特命韓琦與臣
同貳經略歲時之間琦以節制不行而免臣以招納非
宜而罷尋分四路復領中權二年于茲一功未立屢叨
進改深負愧羞雖朝廷憂勞且務姑息而其下將佐觀
臣忝冒必思僥倖豈復有實効之心臣亦何面目以責
率其下令邊略未固兵力未強威令不揚戰鬪多覆因
循已甚平定無期一時寇逼三川其勢可困而葛懷敏
等入賊伏中一戰大潰殺傷滿野驅掠無算臣以本路

多虞救援不早臣方痛心疾首日夜悲憂髮變成絲血
化爲淚殞歿無地榮耀何心今日之恩非臣所望臣昨
蒙朝廷特除邠州觀察使累章獲讓已煩聖聰三黜之
誅豈當再冒然臣有愚心不敢不盡有謬策不敢不陳
雖屬邊臣實叨近職敢不議論少裨聖明傳曰事君如
事親又曰君臣同體當此安危之際豈敢事形迹避嫌
疑而不盡心於君親乎魏元成曰隋以事形迹而亡唐
太宗深然之今願陛下恕臣萬死采臣一言天下幸甚
天下幸甚臣觀易震卦田震亨謂聖人因震恐而致亨
大也禹湯罪已其興也勃焉是皆得易之旨畏天之威
而致其亨矣陛下其捨諸昨者鎮戎兵敗之後天色陰
晦十日不解木冰地震群心憂傷此將帥失人生靈致

陷地震怒之意也冬至後一日申時慶州又地震此陰陽戰而致動占書曰四夷爲中國之陰是夷夏交爭未寧之象也自西事以來延安東路北路官軍傷折萬餘人并金明承平諸寨殺虜過蕃部萬餘戶約四五萬口及麟府喪陷鎮戎三敗殺者傷者前後僅二十萬人矣死者爲魚肉生者爲犬羊臣仰測陛下之心必大震動而天下莫知但見爵賞頒行疑朝廷高枕負茲生靈願陛下因其震動過崇謙讓以柔遠未至選將有差之辭告謝于皇天后土五岳四瀆以哀痛之旨誕告多方下感人心上答天戒陛下旣已罪已兩府大臣必有遜謝之請小損勳爵而復其位臣等則宿兵困民討伐未効罪之大者請落近職左降一官帶責授二字仍削除

經略招討等使名祗管旬部署司公事以謝邊陲以警將佐以勵軍旅如此則天下聞朝廷罪已知陛下之心不負生靈將佐軍旅等見主帥負責知天子必欲破賊即皆震懼甘爲艱辛更無僥倖之望臣等得以嚴率其下日夜聚謀上賴威靈可期平定仍請詔下部署以下非大功不錄鈐轄都監非奇功不賞其班行將校軍士等所得功勞依舊量大小酬獎此救弊之端也今西賊漸熾恐謀深入陛下誠能與大臣密議行臣之策天下幸甚如失此機會行恐後時儻朝廷不取臣言則邊上終無大功寢有大患其勢然矣願陛下以大易之旨取古聖人之用心則震而後亨受景福於無窮庇蒼生於大賚臣之愚心謬策盡於此矣所降到誥勅等臣有此

一策未敢拜受臣無任 云云

謝授知邠州表

臣某言伏蒙聖慈特授臣依前行右諫議大夫充資政殿學士知邠州軍州事及管内勸農使兼陝西四路公邊安撫使改賜推誠保德功臣者陟降秘殿爲寵甚隆撫按邊庭所寄至重臣中謝竊念臣涉道尚淺立身本孤偶緣英主之知獲廁邇臣之列進登二府參預萬幾議刑賞則不避上疑革僥倖則多招衆怨心雖無愧跡已難安而况親奉德音遠憂邊患旣此聞命誠合請行始塵宣慰之名來撫凋疲之俗纔周晉地將適秦關屬府庫之已虛積兵旅之尚衆動費萬計理當三思願假一麾就兼四路亦可處其疆事庶不傷於國財詔旨弗

從留居丞弼之位表章再露請陳戎狄之機伏蒙

皇帝陛下俯照臣心特廻天聽罷政府之重責加仙殿之寵名徃守要藩遙按諸部存茲國體簡于聖心臣敢不即日首塗奉詔行事生民疾苦可得詢求邊塞機宜更當籌慮用罄臣節以酬聖知臣無任 云云

邠州謝上表

臣某言伏奉制命授臣資政殿學士守本官知邠州兼陝西路公邊安撫使已到任訖秘殿清華舊藩要劇祇膺渙渥伏切震驚臣中謝竊念臣生遘文明幼蹈聲教登于造秀之級涉彼州縣之勞寢遷榮塗過被宸眷擢居近府參對大猷詎有興邦之言曾無經國之効自惟三省必匪久安願解貳於黃樞請分憂於紫塞庶供麤

使聊謝輿言伏蒙 皇帝陛下舜聰弗違堯言斯布假
禁庭之要職居郡國之長人兼領使名復重邊寄進退
以禮足爲儒者之榮本未可言盡出大人之造敢不砥
礪風節佩服訓謀不以毀譽累其心不以寵辱更其守
副委遇之本意酬保全之大恩臣無任 二云二云

遺表

臣聞生必盡忠乃臣節之常守沒猶有戀蓋主恩之難
忘輒忍須臾之期少舒迫切之懇痛靡自覺辭皆不倫
伏念臣生而遂孤少乃從學游心儒術決知聖道之可
行結綬仕塗不信賤官之能屈纔脫中銓之冗遽參麗
正之榮耻爲倖人竊論國體昨自明肅厭代之後陛下
奮權之初首承德音占預諫列念昔執卷惟虞無位之

可行況今得君安敢惜身而少避間斥江湖之遠旋塵
侍從之班大忤貴權幾成廢放屬羗臣之負險顧將列
以難裁乃副帥權仍峻使任亦嘗周旋戰備指目地形
力援定川之師始期遇敵誓復橫山之壤亟逼講和雖
微必取之功多弭未然之患預中樞之密勿曾不獲辭
叅大政之幾微益難勝責自念驟膺於寵遇固當勉副
於倚毗然而事久弊則人憚於更張功未驗則俗稱於
迂闊以進賢援能爲樹黨以敦本抑末爲近名洎忝二
華之行愈增百種之謗上繫天聽終辨衆纒因懇避於
釣衡爰就班於符竹一違近署五易各城雖聖恩曲示
於便安柰神道常惡其盈滿請麾上穎蓋遭拙疾之未
平息鞍東徐益覺靈醫之不効唯積疢之見困非晚歲

之能支神不在形氣將去幹冥冥幽壤條爲長往之期
穆穆清光永絕再瞻之望肝膽摧落精魄飛揚然臣起
于諸生歷此華貫雨露澤於數世生組煥於一門有如
臣焉足爲榮矣當瞑目以無憾尚貪生而有云蓋念所
惜者盛時所眷者明主雖性命之際已能自通然君臣
之間豈易忘報但無怛化以竭遺忠敢憚陳於緒言庶
無負於沒齒伏望陛下調和六氣會聚百祥上承天心
下徇人欲明慎刑賞而使之必當精審號令而期於必
行尊崇賢良裁抑僥倖制治於未亂納民於大中如此
則不獨微臣甘從於異物庶令率土永寢於淳風言遂
涕零命隨疏殞臣無任惶懼戰惕之至

范文正公集卷第十六

范文正公集卷第十七

謝轉給事中移知鄧州表

臣某言伏蒙聖恩特授臣給事中依前資政殿學士知
鄧州者洊進榮階往臨善壤允爲允渥彌集震驚臣中
謝竊念臣立跡本孤逢辰甚盛以芻言罔避擢登侍從
之班以睿獎素隆邁預弼諧之列乏增君之善道寡措
國之令謀無補當時自安何地遽上借麾之懇實畏在
梁之譏俄奉明恩曲加異數假職名於祕殿領使輓於
邊藩由朝廷之威靈屬羗戒之欵順方露便安之請忽
頒霽霽之私青瑣是登朱轡載啓臣績未著合陳三讓
之封君命已行懼致再言之黷進退惶惑不知所裁此
蓋伏蒙 皇帝陛下天造曲成皇暉久照敦川澤并包

之量法山雷善養之經憫其勤勞致諸安逸示中外之一體保君臣之至權臣敢不寅奉朝經躬脩民政孜孜共理少望於前賢蹇蹇一心無忘於大節臣已一面起發赴任次無任云云

謝在中書日行遣公事不當放罪表

臣某言近准中書劄子伏蒙聖慈以臣等在中書日行遣李曇男公事不當特放罪者具位之材早虧於國論大明之照終示於天慈爰霽雷霆允爲渙汗臣中謝向以昧陋叅于幾微心則首公智非周物日視四方之奏類多庶獄之疑而有告訐以言情僞未究妖兇旣斃證左弗完上開三面之仁在刑惟恤僉重一成之議至失不經多歷歲時尚騰牒訴伏蒙 皇帝陛下川澤廣納日月委臨察其無他恕茲不及天地之私至大丘山之戴何勝敢不再省前尤一心後效少贖失中之咎用敷報上之誠臣無任感恩荷聖激切屏營之至

鄧州謝上表

臣某言伏奉制命授臣給事中依前資政殿學士知鄧州軍州事已禮上訖瑣闥清品穰都善地處之甚重惴然若驚臣中謝竊念臣志意本微才力素寡始干及親之祿俄有得君之遇啓沃無隱出處惟命持一節以自信歷三黜而無悔頃以氐羗犯塞朝廷盱食起臣思過之地授臣禦戎之策徃罄死力敢圖生還夙夜一心首尾四載僅免輿尸之禍終無克敵之勲一旦召還五章陳讓惟求守塞不敢入朝再煩詔音促登樞右改叅大

政俾竭微才革姑息之風則謀身者切齒尚循默之體
則愛國者寒心退孤上恩進歛羣怨誠難處於要路復
請行於邊鄙方陳豫備之策俄覩綏懷之事迺宣霈澤
以安黎元臣以惠肺久深每秋必發求去互寒之地以
就便安之所庶近醫藥存養晚年伏蒙 皇帝陛下天
覆地生雲濡雨濯進以清近之秩付以偃息之藩風俗
舊淳政事絕簡心方少泰病宜有瘳實繫寬大之朝將
幸康寧之福敢不孜孜于善戰戰厥心求民疾於一方
分國憂於千里上酬聖造少罄臣誠臣云云

謝依所乞依舊知鄧州表

臣某言奉勅就知荆南府續准中書劄子奉聖旨允所
乞依舊知鄧州者明命已行輒希改易危誠既露俄遂

便安臣志獲宣天慈何報臣中謝臣涉道素淺立身最
孤早由睿摺之知荐更繁劇之任頃升近弼思副上心
以道直前雖危不避竭肝膂以論事犯雷霆而進忠未
酬天地之恩已掇風波之議尚蒙聖渥俾守善藩忽此
就遷實隆倚任臣以本朝盛德優禮近臣多處京輔之
間以存國體之重而又子有疾恙日常憂虞復困道塗
仍遠醫藥遂至再三之瀆庶通萬一之情伏蒙 皇帝
陛下曲軫私私特回中旨許留舊治免涉長川蓋推體
貌之恩曷副照臨之意敢不拳拳民政戰戰官箴誓堅
介石之心仰答高穹之造臣云云

杭州謝上表

臣某言昨奉勅就差知杭州軍州事已到任禮上訖江

海上游東南巨屏所寄至重爲榮極深臣中謝竊念臣
生稟迂踈親逢明盛居常苦節動必危言踐揚諫諍之
曹傾盡諮詢之地至於徃司戎事屬當元帥之權入奉
聖謀爰廁大臣之列有致君之素志乏代天之懿功魏
相之數陳便宜頗蒙納用汲黯之多犯顏色敢憚見踈
雖遼隔於明天亦荐分於善壤共理吳會之域奉揚唐
虞之風跡雖遠而獲安年已高而就逸此蓋 皇帝陛
下天施廣育海務兼包寵優舊臣恩全晚歲臣敢不抱
公忠之節始終弗回體盱具之憂遠邇咸一又茲方面
副于宸心臣云云

謝賜鳳茶表

臣某言入內西頭供奉官麥知微至傳宣旨撫問臣

賜臣鳳茶一合者久離帝右曷測天衷異恩一臨群疑
盡決臣中謝竊念臣至誠許國孤立事君屢觸雷霆之
威數蹈風波之險一心自信三黜寧逃方安江海之情
敢覲雲天之問伏蒙 皇帝陛下仁存舊物澤被遠臣
聖訓丁寧皇慈委曲念犬馬之微志錫龍鳳之上珍馨
掩靈芝味滋甘醴濯五神之精爽祛百疾之冥煩允彰
仁壽之恩特出聖神之眷謹當餌爲良藥飲代凝冰思
苦口以進言勵清心而守道上酬君父旁贊神明臣云云

謝轉禮部侍郎表

臣某言伏蒙聖慈特授臣尚書禮部侍郎依前充職者
渙渥自天震惶無地循牆弗獲致冠是虞臣中謝伏念
臣布素寒姿斗筭微器初縻下士之祿忽塵上聖之知

歷升近班嘗預大政深自感激詎爲因循仰祖宗之謀
請行故事懷社稷之計動發危言雖欲必盡其心奚能
久安於位遽彰無狀誠合有誅而聖意始終天慈曠蕩
尚寘名於祕殿復蒙幸於善藩大拙云藏人言用息莫
聞課最敢覬龍光伏蒙 皇帝陛下雷霆震威日月還
照未忘圖舊不次推恩擢登宗伯之曹上應文昌之緯
職命如故爵數甚隆徒執讓以弗諧止服榮而爲懼臣
敢不夕惕三省寅恭一心進則盡憂國憂民之誠退則
處樂天樂道之分上酬聖遇用竭愚衷臣云云

乞召杜衍等備明堂老更表

臣某言伏覩朝廷行明堂宗祀之禮誕告天下臣守在
遠方不獲榮觀大慶思有補益輒茲狂易臣中謝臣聞

易曰大觀在上言天下所觀在國家之爲也自古國家
興行風教使天下觀之必先乎廟周人祀文王於明堂
以配上帝所以示天下尊親之道漢顯宗永平二年春
正月祀光武於明堂其年冬十月養三老五更於辟雍
三老五更以二千石祿養終厥身前史紀之爲令王之
盛節伏惟 皇帝陛下稽古奉先行明堂大禮尊奉三
聖配帝而饗普天率土咸知舞抃至於三老五更之典
最爲盛德宜可兼而行之如前兩府老臣惟太子太保
杜衍太子少傅任布在焉衍直清忠蓋勤勞弼亮布廉
絜不渝止足知退皆可備三老五更之選儻朝廷以禮
大數煩難於並舉亦可召至俾陪觀大禮及覃慶之際
特加恩獎是亦兼行養老之典也臣又覩工部侍郎致

仕郎簡執節清素處心雅尚優游泉石樂於吟詠今八十三歲精明不衰月俸之餘不治生業此則臣所目見之也而歸老十餘年不曾遷改亦無錫賜况天下似此近上老臣甚少不難旌獎如郎簡則去京遙遠難行召命可遙均三老五更之慶伏望聖慈稽考舊章特加恩禮自餘致仕官亦乞朝廷別賜推恩寔當尊親之朝兼行養老之典足以表大禮之盛彰上聖之仁興天下之孝悌光搢紳之耆舊史官書之為陛下之至德曄曄于千古干冒天威臣不任大願戰汗云云

青州謝上表

臣某言奉勅就差臣知青州充青淄等州軍安撫使已到任交割勾當者海岱之區地望攸重岳牧之任邦選

甚隆拜命以還戴榮而懼臣某中謝竊念臣賦才寡薄抱節孤危會遇不倫進擢無狀發言多忤非輕去明主之恩觸事為憂所重在太平之業消塵未補覆載何酬尚玷鴻私屢加優寄漸茲衰朽期以退藏伏蒙 皇帝陛下天量庇全聖衷收采改此劇藩之守謹諸連帥之權臣敢不逾勵夙宵虔分旰食體九重之深造安千里之含生上副聖求少圖忠効臣云云

范文正公集卷第十八

代人奏乞王洙充南京講書狀

右臣聞三代盛王致治天下必先崇學校立師資聚群材陳正道使其服禮樂之文游名教之地精治人之術蘊致君之方然後命之以官授之以政濟濟多士咸有一德列于朝則有制禮作樂之感布于外則有移風易俗之善故聲詩之作美上之長育人材正在此矣國家崇儒敦古右文致化王京五府多建庠序當州近輔之郡宜崇治本兼至聖文宣王廟已有學舍三十餘間有修學進士二十餘人非有講貫何以發明臣竊見賀州富川縣主簿充應天府書院說書王洙於天聖二年御前進士及第素負文藻深明經義在彼講說已滿三年

伏望聖慈特與除授當州職事官兼州學講說所貴國
家教育之道風布於邦畿進脩之人日聞於典籍士務
稽古人知嚮方干冒聖威臣無任云云

求追贈考妣狀

右臣竊露微衷仰干睿聽寔威匪遠淵懼斯深伏覩編
勅節文一應京朝官在任未滿不因公事朝廷非時移
替在任不曾磨勘轉官者後來同計及三周年不以到
闕在任並與磨勘者伏念臣自蒙恩改授京官到今七
年除持服月日外亦以四年餘兩箇月不敢僥求磨勘
今爲遷奉在近未曾封贈父母竊念臣襁褓之中已丁
何怙鞠養在母慈愛過人恤臣幼孤憫臣多病夜扣星
象食斷葷茹逾二十載至于其終又臣游學之初違離

者久率常殞泣幾至喪明而臣仕未及榮親已不待旣
育之仁則重罔極之報曾無夙夜永懷死生何及今又
俯臨葬禮尚闕褒封祭奠之間誌述之際乏茲恩數逼
於哀誠身廁登瀛之華親無漏泉之澤矧遇孝理若爲
子心今欲將磨勘改轉官恩澤乞先移贈考妣所冀
厝之日得及追榮况臣在壯年序進未晚伏望 皇太
后陛下 皇帝陛下深軫仁仁俯從危素特降曲成之
造更覃廣愛之風則人子至榮獲顯親於不次君父大
賜必捐軀而是圖臣無任云云

奏致仕分司官乞與折支全俸狀

右臣伏覩先降勅命指揮乞致仕官三丞以上與一子
身事後來甚有朝官因此陳乞自贊善大夫以下文武

官即未殊恩鮮聞致政臣切見外處勾當文武臣僚幕
職州縣每有疾患昏耄之人百姓無告本路轉運使長
吏欲行體量或聞貧處不忍廢罷臣聞先王養老莫不
推仁在於公朝宜行懋典伏望聖慈應致仕分司官今
後每遇郊裡各與進秩耆耄蓋寡優渥何傷內致仕官
并乞與折支全俸况國家折支物色朽腐無筭又所估
太高久宜制置庶能周濟以養衰殘其文資未有朝散
階者仍乞就加庶明尚齒之恩異於班列其三班使臣
判司簿尉以其非大夫之等未有致仕條例亦乞與南
班上佐等第別降指揮所貴休官之人不甚失所勸臣
下廉退之節彰君親存覆之仁遂其優閑免於窮困如
允臣所奏即乞特出聖恩指揮

舉歐陽脩充經略掌書記狀

右臣叨膺聖寄充前件職任即日沿邊巡按其有將帥
之能否軍旅之勇怯人民之憂樂財利之通塞戎狄之
情偽皆須廣接人以訪問復盡心以思度其於翰墨無
暇可爲而或奏議上聞軍書叢委情須可達辭貴得宜
當藉俊僚以濟機事臣訪於士大夫皆言非歐陽脩不
可文學才識爲衆所伏往者緣臣之罪有黷朝聽蓋本
人素好議論聞于搢紳只如臣爲諫官之初杜衍任中
丞之日脩皆曾移書責臣等緘默無執非獨有高若訥
之讓也以此明之實非朋黨若訥知其無他亦常追悔
臣切於集事不敢避嫌其人見權滑州節度判官伏望
聖慈特差充經略安撫司掌書記隨逐巡按所典書奏

並國家之事非臣下之私若不如舉狀臣甘欺罔之罪
云云

舉張方平充經略掌書記狀

右臣今分經略安撫都部署司職任在延州又發遣延
州兵民公事其應荅諸路文字動涉機宜日不暇給凡
有奏報朝廷事須精密臣獨力當之必有謬誤經略雖
有判官三員多在本司及別路勾當臣昨舉歐陽脩充
本路掌書記尋以召歸館閣更不赴任臣竊見著作佐
郎通判天雄軍張方平富於文學復有才用乞朝廷改
除充本司掌書記

舉彭乘自代狀

准勅應係兩省臺官尚書省六品已上諸司四品已上

授訖具表讓一人自代者

右謹具如前臣奉勅就轉尚書戶部郎中依前充職臣
伏見京西提點刑獄尚書祠部員外郎充集賢校理彭
乘博學不倦孤立無徒館殿之中獨為淹久臣今舉自
代

舉許渤簽署陝府判官事狀

右臣竊見權潤州觀察推官許渤在鄉曲時衆推孝行
登仕宦後自守靜節天禧二年進士及第授初等職官
數任別無過犯至今猶是初等清心至行不求聞達復
通經術長於論議苟非叩擊似不能言伏望聖慈特與
改轉京官簽署陝府判官廳公事庶旌廉退之士以抑
僥競之風如後犯正入已贓臣甘當同罪

舉滕宗諒狀

右臣竊見知涇州刑部員外郎直集賢院滕宗諒詞才公器周於致用曾出聖選擢在諫司當時同列之人並已清顯今涇原已有帥臣本州不屯軍馬別無劇務欲乞朝廷改除於繁重處任使如無稱効及有所犯臣甘當同罪

舉丘良孫應制科狀

右臣伏覩先降勅節文今後應京朝官幕職州縣官不曾犯贓私罪情輕並許應賢良方正科目者竊以國家下賢良之詔求補益之言非止掄材將以致治先王坐以待旦旁求俊乂必以得士爲昌不以限年爲重臣竊見權耀州觀察推官丘良孫學術稽古文辭貫道求之多士宜奉大對臣今舉本人堪應上件科目伏乞朝廷特賜召試若不如舉狀甘俟朝典

舉張昇自代狀

右臣伏蒙聖慈特授尚書禮部侍郎臣伏見工部郎中集賢殿修撰知澗州張昇筮仕以來清介自立精思劇論有憂天下之心純誠直道無讓古人之節朝野推重臣所不如乞廻臣所授以允公議

舉張伯玉應制科狀

右謹具如前臣竊見秘書丞知并州太谷縣事張伯玉天賦才敏學窮闡與善言皇王之治博達今古之宜素蘊甚充清節自處嘗應科舉未親冊對如令仰被清問罄陳大略必能竭前人之正論副大君之虛懷擇而行

之有補聖政臣今保舉其人堪充應賢良方正能直言
極諫科若不如所舉臣甘俟朝典

舉張閻孫復狀

右臣伏覩赦書節文應天下懷材抱器或淹下位或滯
草萊委逐處具事由聞奏臣觀國家居安思危搜羅賢
俊以充庶位使民受賜此安邦之正體也臣竊見試將
作監主簿張閻文學履行有名於時前應茂材異等科
再考中式以父喪不得就試近上封事貽露國恩職不
稱才衆知沉俊臣又見兗州仙源縣寄居孫復元是開
封府進士曾到御前素質詞業經術今退隱泰山著書
不任心通聖奧跡在窮谷伏望朝廷依赦文採擢張閻
乞除一陝西藩鎮職事官孫復元賜召試特加甄獎庶

幾聖朝渙汗被于幽滯

除樞密副使召赴闕陳讓第一狀

右臣等各准中書劄子奉聖旨令臣等交割本職公事
與鄭戩管勾訖乘遞馬疾速發來赴闕者臣等未立邊
功忽承召命必慮別有進擢實不遑寧伏緣臣等自領
經略之任竭心戎事其於邊上利害軍中情僞年歲之
後方能諳悉至若倉卒之際賊謀百端熟於見聞始可
料度且朝廷舉天下之力應副西事于今累年賊氣尚
驕屢爲邊患是朝廷責臣等立効之秋臣等盡節報國
之日况賊界雖來請和或恐盟約未合近復却有黠集
事宜將來倍湏禦備今去防秋只是百餘日間夙夜經
營猶恐闕漏臣等若更離去或致踈虞不惟上悞朝廷

愈長寇孽顯是臣等自貪寵異移過後人雖當萬死何以塞責兼近蒙差降中使宣諭臣等候邊事稍寧用在兩地臣等尋具奏聞且乞依舊陳力此由衷之請天鑒可明即非今來虛有陳讓伏望聖慈念邊事至大不可差失特降中旨允茲至誠許臣等且在本任庶竭疲駑得裨萬一臣等無任云云

第二狀

右臣等奉聖旨令疾速赴闕臣等爲邊事未寧防秋在近已具奏聞乞且在本任去訖竊念臣等自臨邊鄙久阻闕廷入對清光人臣所願忽承召命豈合稽留然事有可憂須當陳列伏自西事以來邊上帥臣數有改易天下知其不便朝廷每曠官承乏不得已而行之臣等

四年之中三換邊任不聞成效固當坐責昨以涇原師敗之後朝廷命臣等兼領四路以禦劇寇臣等夙夜議論思有報効奏選將佐促治城寨閱習軍馬完補器械爲向秋之備但西人詣闕方議納和臣等不敢出入塞下恐涉生事然常防慮詐計未嘗懈心且西賊前來誓書甚明以四十年之恩信一旦翻覆况今情僞未知復有點集之說此大可憂防之日也臣等於此處置纔以諳練上下之情方且稟信節制進退庶無大軋若貪冒寵榮輒便舍去則是復有帥臣數易之弊如寇患再作臣等躬親邊事猶懼不濟或遠料賊情則多失機會且臣等自膺寄任蒙朝廷推信日重一日凡百陳請如在帷幄無不施行是臣等遭遇盛明盡節立事之時也所

以感激剖述願留歲年或寇患必息則脩固邊備爲他時之防如其未寧則與將佐合心持重禦捍宜無深入之憂如賊志徇疆終難調伏則臣等選練兵將於三二年間仗朝廷威靈討服橫山界近蕃以遏外患臣等志在分憂非敢飾讓近名頻煩天聽乞聖慈深照臣等無任云云

第三狀

右臣等近以邊事未寧忽承召命兩陳奏牘且乞在任誠慤斯至利害甚明尚慮朝廷未垂照悉謂臣等以禮爲讓務取虛名俟及再三即當上道是以重煩天聽終期得請竊以處勞而思逸重內而輕外人之常情也今臣等勤勤懇懇且願竭力塞下豈置身艱苦違人情之

所樂以矯時干譽者哉誠以經畫西陲于今累歲雖無毫髮之効上副委遇其如軍中之事粗已諳詳况西賊父祖以來蓄養姦謀一旦叛命乘累勝之氣而遣人納和此固苞藏禍心別營兇計今防秋急備都無數月之期臣等若貪冒寵榮便離職任向去或有侵軼害及生靈使朝廷重憂後人當患則有識之人孰不責咎何施面目以對威顏雖伏顯誅亦無所救故臣等披瀝肝膈屢有奏述且乞在任以盡疲駑持重保邊庶少敗事或且許其盟約未解防虞則願更留歲月之間補完闕漏縱其翻覆不失枝梧萬一寸功有立寇患稍平則朝廷進用有名臣等歸朝未晚愚衷感切天地可明唯君知臣必當鑒諒伏望聖慈開納早賜允俞臣等無任云云

第四狀

右臣等自承召命累上封章乞且留本任聖明之照必
察愚衷然慮朝廷謂成命已行不許改易或謂三讓爲
禮未賜允可臣等莫遑啓處重煩天聰竊念臣等本以
書生昧於兵術朝廷委茲邊事不獲固辭三數年間勉
心疆力徒懷憂患罔敢暇逸至於勲績絕無稱道雖天
心至仁尚賜全宥臣等當自循省更思報効豈復舍邊
陲之患冒朝廷之寵以取重悔哉所乞且在本任者非
敢自謂必能銷殄兇寇以安西鄙蓋臣等受國重委必
於戎政或才力不足終坐重責是臣等之分也若不能
畢事移患後人而得謂之忠乎况自來帥臣初至則衆
多之言爭陳利害於軍民蕃部之中號令處置頻有更

改是以邊塞衆情皆安於習舊而憚於新規又將佐勇
怯未能盡知倉卒之時指縱或誤則其害不細故未平
定間忌在數易此朝廷之所明知况今國家急務在於
西陲臣等於此用之不爲不重乞聖慈特迴天鑒使得
盡臣子之心臣等云云

第五狀

右臣等近者忽承詔旨俾赴闕廷繼上奏封且乞在任
未量聖慈果悉愚誠夙夜震違若無所措伏念臣等自
西寇猖獗久當戎事雖才不逮志未有成績若其裁處
軍政審料敵情旣踰歲年粗亦詳練故邊防憂患之急
臣等去就之分前奏備列不敢煩陳今所切者吳賊累
次盜邊必先僞達誠款伺我少懈隨即奔衝今又遣人

請和往復遷延即過夏月其或盟約未合必是又圖侵軼而朝廷當經營防秋之際動易帥臣送故迎新衆情自擾則於禦捍之事不無廢闕賊如乘我不備適足遂其姦謀則是朝廷以西事爲輕而以進擢微臣爲重或因此有誤大計更滋寇孽則臣等貪冒寵異情何以安臣等所以知遠在朝廷不若親臨疆場蓋耳目所接指縱爲便庶於倉卒不失事機况今干戈未寧民力漸屈忠義思奮聖宸重憂宜拔非常之才待以不次之位使其恢宣賢業講求廟筭臣等自當奔走塞下奉行勝畧如此則內資帷幄之議外期節制之行用以相須冀乎必濟伏望聖慈察臣等忠蓋之懇素有本末實不以內外之職輕重於心早賜允俞使盡臣子之節臣等云云

賀胡侍郎致政狀

伏審侍郎進清崇之爵諧高尚之風耆德尊隆睿恩深厚榮映之下慶仰居多恭以侍郎誠明自天進退由道宣三德於夙夜被四紀於龍光赫有華名密多陰施艱難險阻盡力乎三朝富貴崇高致身乎五福而乃起達人觀引大夫之年聰明不衰止足自處國家興廉讓之節疏渙汗之仁寵數優賢休聲載路耀錦南國邑子榮太守之歸掛冠東門都人謁大夫之歎爲儒及此其樂何涯伏惟上爲聖朝倍報崇重舜好清問方體貌於宿賢國有老成尚彌縫於顯道某久荷鈞綬卑情無任榮觀景仰抃躍之至

范文正公集卷第十八

范文正公集卷第十九

陳乞邠州狀

右臣聞臣之事君也貴先勞而後祿朝之命官也患重
內而輕外重內輕外何以收藩翰之功先勞後祿所以
勵搢紳之志臣雖無似輒慕前修臣昨在朝日曾與韓
琦同進陝西攻守策又親手詔云今用何人鎮彼西方
又去年秋曾有聖旨令韓琦與臣牙換往邊上照管臣
遂面奏乞罷叅知政事知陝西一郡兼沿邊安撫使乞
不轉官及不帶招討部署之名尋蒙聖恩差充陝西宣
撫使又以契丹舉兵西征元昊在河東接近復差臣兼
河東宣撫使臣自至河東體量得邊上利害各已奏陳
今余靖自北既回必見契丹無南牧之意臣久住州軍

亦慮煩擾欲過陝西即又宣撫使所行諸軍須望特支恩澤緣南郊均賜之後陝西府庫已虛或更行特支又須費十數萬貫如不往陝西則前所上攻守之策復成空言伏望聖慈依臣前來面奏罷叅知政事并安撫使只差臣於邠涇間知一州帶公邊安撫使乞不轉官仍不帶招討部署之名如此則不銷更散特支自可就近處置邊事臣此直誠並守前奏俟三二年間邊事寧息攻守有備儻聖恩未移用臣不晚庶朝廷無內重外輕之失臣亦有先勞後祿之效進退始終良得其宜臣無任云云

陳乞鄧州狀

右臣聞理之安危固當殊體官之廢置孰可冒居竊念

臣昨厠台司日瞻宸扆親承睿詔俯念邊防思得邇臣徃分重寄臣既獲闡命因敢請行遠將宣慰之恩來安屯戍之旅臣以戎情未測備預當嚴願領一藩兼按四路欲將臣與韓琦所上邊策躬親施行尚蒙朝廷付茲職任臣自到邠土已逾半年復以前策奏陳庶逃尸素朝廷以彼戎款順方用柔懷不欲脩威恐成生事臣之所上必可寢停今又覩朝旨據鄜延路奏所定疆界並已了當仰保安軍鎮戎軍權務通行博易者事或寧靜理當改更其陝西邊事自有逐路經略使處置惟此四路安撫司今後別無事務欲乞朝廷指揮廢罷臣則宿患肺疾每至秋冬發動若當國有急難之時臣不敢自求便安且當勦力今朝廷宣示西事已定况邠州元係

武臣知州伏望聖慈恕臣之無功察臣之多病許從善地就訪良醫於河中府同州或京西襄鄧之間就移一知州取便路赴任示君親之至仁從臣子之所望實繫聖造得養天年臣無任瞻天望聖云云

與李宗易向約堪任清要狀

准御史臺牒准慶曆八年五月十四日勅節文於內外升朝官曾任通判成資以上人內堪任清要任使者各同罪保舉貳名並湏歷任無公私過犯及不是見任兩府并自己親情方得奏舉或雖公罪杖以下情理輕亦許論薦者右謹具如前臣伏見知絳州職方員外郎向約生相輔之家而能專儒學謹官業廉貧苦節慎靜寡過臣前知潤州日約為通判備見操守後來累次為郡

皆有理績推舉甚衆未蒙獎擢知光化軍屯田員外郎李宗易天禧三年進士第九人及第素負詞雅居常清慎有靜理之才無躁進之跡今在隣屬稔聞治狀人憂其去吏不敢苛此二人者久於揚歷各有行實並堪充清要任使如朝廷擢用後犯入已贓臣甘當同罪即不是見任兩府并自己親情歷任並無私罪內有公罪者亦係杖已下情理不重謹具狀奏聞伏候勅旨

舉張諷李厚充青州職官狀

伏奉勅命就差知青州兼安撫使已到任訖今具合奏辟官二員如後一前御史臺主簿張諷文學懿瞻履行純雅未升科進的有才稱欲乞朝廷采於清議推以異恩特賜召試授一出身差簽署青州觀察判官廳公事

新注下正官王嘉祥即今未到乞勘會京東路節鎮別
除一處一鄧州南陽縣主簿李厚進士出身素有文行
涉道且深到任已成一考見權鄧州職官欲乞朝廷特
除權青州兩使推官兼管句安撫司機宜文字節度推
官近新到任乞移側近州郡如難得闕即乞許令安撫
司差權見闕官處句當所貴不住俸給况本路見闕官
數真右謹具如前臣受國寄任日憂曠闕或得此二人
助其不逮庶無敗事如朝廷擢任後犯入已賊及不如
舉狀臣並甘當同罪謹具狀奏聞伏候勅旨

薦李觀并錄進禮論等狀

右臣聞古之明王坐以待旦旁求俊乂蓋將盡天下之
才成天下之務故為臣者以舉善為忠亦將竭知人之

明副待旦之意也臣親逢聖旦嘗忝輔臣輒慕前修之
為少荅非常之遇臣伏見建昌軍草澤李觀前應制科
首被召試有司失之遂退而隱竭力養親不復干祿鄉
曲俊異從而師之善講論六經辯博明達釋然見聖人
之旨著書立言有孟軻楊雄之風義實無愧於天下之
士而朝廷未賜采收識者嗟惜可謂遺逸者矣臣竊見
往年處州草澤周啓明攻於詞藻又江寧府草澤張元
用及近年益州草澤龍昌期並老於經術此三人者皆
蒙朝廷特除京官以示獎勵臣觀李觀於經術文章實
能兼富今草澤中未見其比非獨臣知此人朝廷士大
夫亦多知之臣今取到本人所業禮論七篇明堂定制
圖序一篇平土書三篇易論十三篇共二十四篇為十

卷謹繕寫上進伏望聖慈當乙夜之勤一賜御覽則知斯人之才之學非常儒也其人以母老不願仕官伏乞朝廷優賜就除一官許令侍養亦可光其道業榮於閭里以明聖人在上下無遺才若不如舉狀臣甘重受朝典謹具狀奏聞伏候勅旨

進故朱宋所撰春秋文字及乞推恩與弟寘

狀

右臣伏見故秘書丞集賢校理朱宋幼有俊材服膺儒術研精道訓務究本源越自經庠擢升文館力學方起美志未伸不幸夭喪深可嗟悼宋春秋之學爲士林所稱有唐陸淳始傳此義學者以爲春秋之道久隱而近乃出焉宋苦心探賾多所發揮其所著春秋指歸等若

十卷謹繕寫上進乞下兩制詳定如實可收采則乞宣付崇文院又念其人家道貧窶妻息孤窮有親弟寘亦習儒業未登祿仕伏望聖慈特霑一命况宋曾任府界提點偶緣病罷別無過犯中前監察御史梁堅蔡稟等亡後亦蒙錄用子孫體例頗同不爲僥倖以彰聖朝旌錄儒學使其孤幼不墜丘壑亦天地之造也干冒宸嚴臣云云

陳乞穎毫一郡狀

右臣輒陳危惻上黷高聰逖仰雷霆不任淵谷切念臣涉道至淺賦財本下爰從孤宦首被聖知自謂得君未嘗避事險易一志周旋四方今守東齊方面亦重救災禦寇敢不盡心而年高氣衰日增疾恙去冬已來頓成

羸老精神減耗形體尪弱事多遺忘力不支持其青州
常程公事已牒通判職官發遣其安撫一路九州軍兵
馬公事繁多至於郡縣利害鄉川寇盜皆稟本司指縱
自臣抱病旬管不前上無以分宵旰之憂下無以逃尸
素之誚惟是奏報文字臣則竭心勉率亦多稽緩揣已
量力實不自安伏望聖慈於潁亳二州就差臣一處所
貴閑慢少事可以養疾庶安朽質少保殘年仰祈洪造
之私惟誓丹衷之報臣無任云云

論西京事宜劄子

臣近親奉德音以孔道輔曾言遷都西洛臣謂未可也
國家太平豈可有遷都之議但西洛帝王之宅負關河
之固邊方不寧則可退守然彼空虛已久絕無儲積急

難之時將何以備宜以將有朝陵之名漸營廩食陝西
有餘可運而下東路有餘可運而上數年之間庶幾有
備太平則居東京通濟之地以便天下急難則居西洛
險固之宅以守中原易曰天險不可升地險山川丘陵
王公設險以守其國此之謂也先王脩德以服遠人然
安不忘危故不敢去兵以恃德也陛下內惟脩德使天
下不聞其過外亦設險使四夷不敢生心此長世之策
也伏望聖慈未煩下議且留聖意可俟臣口對不備謹
再具狀奏聞

論復併縣劄子

臣伏覩赦書節文西京河陽管界諸縣近經併廢頗聞
人民不便並特令依舊臣去年秋纔入中書蒙聖慈差

中使催臣言事臣首陳七事內一事爲天下民困由吏役煩重如西京在後漢時三十七萬戶置二十縣唐會昌中十七萬戶置十九縣今有五萬六千戶尚置十九縣是戶口十分去七而縣額如舊吏役不減安得百姓不困哉後漢光武詔天下併減四百餘縣此治世之規可舉爲法臣請先於西京減併縣分以省吏役奉聖旨下范雍并本路轉運使密切相度聞奏尋據范雍夏安期等奏相度西京縣邑衆多人戶差役頻併今來減縣邑爲鎮實亦利便除山險空迥地里濶遠及陵寢所安難爲廢罷外乞併作十三縣委得允當別無妨礙尋蒙朝廷依奉降勅施行訖約計減役人一千五六百戶已放歸農官負亦已省罷訖竊聞後來有臣僚上言或稱

縣尉檢覆地遠且逐縣界分俱不及百里如南方縣分有三二百里者亦只一員縣尉以此方之甚不遙遠或稱却費軍人守把其守把軍人即非旋有招置並是本府宣毅兵士在本府中亦須請受或稱酒稅虧額今體問得逐鎮比舊日却有增盈其所上言皆非害民之事情況無實狀只是坊郭物力之人恐產業閑慢或逐縣公人中有巢穴已成不願更改者因茲妄說不便扇搖人情致臣僚誤有採聞形于奏牘朝廷未深窮究便以爲然改已行之命特作霽恩而不知一千五六百戶免役之家重加勞擾殊非霽恩之意只是坊郭物力之人縣邑狡猾之吏遂其志願僥倖歡呼必有作感聖恩道場以感朝聽者其鄉川之民弃農就役復爲愁苦是害其

本而徇其未也且光武之朝詔下併四百縣何號令之
行無敢沮者今朝廷止併六縣而號令已出敢有沮言
是國家命令不行於外恩澤不逮於民矣國政如此則
天下無事可行皆欲守因循之弊弊不可救亂所由生
且西京在漢時三十七萬戶置二十縣今五萬六千戶
置十九縣其吏役勞擾亦甚明白非隱昧之事臣爲近
輔請行此令者蓋欲蘇息窮民且非利己緣親奉德音
并降中使促令論列時事非臣輒有改易况典故甚明
非出自宵臆如上言不當乞朝廷直行黜罷不銷重擾
生民而沮此一議若轉運使等定奪不當亦乞朝廷駁
下不當事件特行勘問明示責降自然利害分別中外
無疑臣本上言之人如不黜罷其元定奪之官又不勘

問却將重擾生民之事作恩宥施行於體不便不知令
諸縣仍舊惠及何人臣爲朝廷惜此一舉使天下無復
有省役息民之聖伏望聖慈指揮西京未得追擾放役
之人別候朝廷指揮更年歲間利害旣明謗議自息所
以懇懇上言者忝爲輔臣知利害不能執守則國家之
惠必不能行生民之弊亦不能去儻朝廷以臣僚上言
爲是以臣所言爲非即乞依臣所奏早加勘劾速行降
黜臣即方敢伏罪不復論列取進止

乞修京城劄子

臣危言孤立久荷聖知當此旰食之憂豈可循默自守
雖言而無取亦以盡臣子之心臣先於景祐三年五月
初在開封府曾進劄子言西洛帝王之宅絕無儲蓄乞

聖慈以將有朝陵爲名使東道有餘則運而西上西道有餘則運而東下數年之間庶幾有備太平則居東京舟車輻湊之地以便天下急難則守西洛山河之宅以保中原當時臣言西洛可營者以備急難也今北事旣動管洛已晚臣今別有愚見請一二以陳之臣竊聞修建北京以禦大敵以臣料之可張虛聲未可爲倚何哉河朔地平去邊千里胡馬豪健晝夜兼馳不十數日可及澶淵陛下乘輿一動千乘萬騎非數日可辦倉卒之間胡馬已近欲進北京其可及乎此未可一也又承平已久人不知戰聞寇大至羣情憂恐陛下引憂恐之師進涉危地或有驚潰在爪牙之臣誰能制之此未可二也又北京四面盡平絕無險扼之地儻乘輿安然到彼

而胡馬旁過直趨河南於澶淵四向乘東而渡京師無備將何以支宗廟社稷宮禁府庫皇宗戚里之屬千官百辟之家六軍萬民血屬盡在無金城湯池可倚無堅甲利兵可禦陛下行在河朔心存京師豈無迴顧之大憂乎此未可三也假使大河未凍寇不得渡而直圍守澶淵聲言向闕以割地會盟爲請當此之時京師無備胡塵俯逼陛下能堅守不動而拒其請乎唐明皇時祿山爲亂舊將哥舒翰引四十萬兵屯守潼關請不出戰且以困賊楊國忠促令討賊戰大敗遂陷長安今京師無備寇或南牧朝廷必促河朔諸將出兵截戰萬一不勝則有天寶之患朝廷將安往乎昔煬帝盤遊淮甸遠關中唐祖據之隋室遂傾明皇出幸西蜀非肅宗立

于朔方天下豈復爲唐矣德宗欲幸益部李晟累表乞
且幸山南以係人心乃知朝廷萬邦之根本今陝西河
北聚天下之重兵如京師搖動遠重兵則姦雄奮飛
禍患四起臣聞天有九關帝居九重是王者法天設險
以安萬國也易曰天險不可升地險山川丘陵王公設
險以守其國正在今日矣臣請陛下速修東京高城深
池軍民百萬足以爲九重之備乘輿不出則聖人坐鎮
四海而無順動之勞鑿輿或出則大臣居守九重而無
迴顧之憂矣彼或謀曰邊城堅牢不可卒攻京師坦平
而可深犯我若修完京師使不可犯則是伐彼之謀而
沮南牧之志矣寇入之淺則邊壘已堅寇入之深則都
城已固彼請割地我可弗許也彼請決戰我可勿出也

進不能爲患退不能急歸然後困而撓之返則追之縱
有抄掠可邀可奪彼衰我振未必不大勝也此陛下保
社稷安四海之全策矣或曰京師王者之居高城深池
恐失其體臣聞後唐末契丹以四十萬衆送石高祖入
朝而京城無備閔宗遂亡石晉時叛臣張彥澤引契丹
犯闕而京城無備少主乃陷此皆無備而亡何言其體
哉臣但憂國家之患而不暇顧其體也若以修完城隍
爲失體不猶愈於播遷之禍哉朝廷大臣百辟必曉此
事但懼議者謂其失體而不敢言臣任在西陲非當清
問而輒言此事誠罪人也然臣子之心豈敢忘君親之
憂况臣素來愚拙惟知報國而不知其受謗矣昔奉春
君負販之夫勸高祖都關中而張良贊之翌日命駕臣

文選卷六
叨預近列而輒建言比之奉春之僭未甚爲過至於西洛帝王之宅太祖營修蓋意在子孫表裏山河接應東京之事勢連屬關陝之形勝又河陽據大川之險當河朔河東會要爲西洛之北門又長安自古興王之都天下勝地皆願朝廷留意常委才某重臣預爲大備天下幸甚于犯聖威臣無任云云

又

臣近覩邸報有北使到闕遠近稱慶及見逐處關報事宜却言西北兩界各大點集比疑北使之來未甚誠實以四十年之恩信無故動搖恐非有限之貨能足無厭之心此可大爲之防盟誓不足倚也戎情翻覆自古非一臣竊覩朝廷未修東京而先修北都臣謂東京根本

也北都枝葉也雖先朝曾有北都之行當時有宿將舊兵嘗經大敵然猶上下憂疑盤桓而進今太平已久人情易動又無宿將舊兵不可不過慮也臣見邊上將佐軍旅耻言不武爭乞勅命及其臨敵十無一勇臣恐駕前諸班武士務誇膽勇有悞陛下昔漢樊噲對上曰臣願得十萬衆橫行匈奴中季布叱曰噲可斬也昔匈奴圍高帝於平城漢兵三十二萬噲時爲上將軍不能解圍今言以十萬橫行是面謾也今陛下自顧左右將軍有如樊噲者乎臣昨上言請修京城宜持重而不動者蓋爲此也若將巡幸北都臣謂有可慮之事者五願陛下思之臣三四年來聞人所傳契丹造舟安輪遇陸可載遇川可濟如南牧而來於滄德之間先渡黃河取鄆

濮而襲我京城陛下虛往北京而寇入東路此可慮之一也又宗廟社稷皇宮咸里千官百辟六軍萬民之家盡在京師而城池無備寇或大至將何保守此可慮之二也若巡幸北京六軍盡出迴顧京師億萬之中或有姦兇竊發為亂陛下之心能安於外乎此可慮之三也假使鑾輿未出寇逼澶淵聲言向闕有割地之請既京師無備朝廷能拒其請乎此可慮之四也又胡馬之來必數十萬其河朔之兵當須持重如京城無備畏彼深入必促重兵與之決戰萬一有哥舒之敗則社稷為憂此可慮之五也願陛下必修京城可禦大患况天子之城古有九重之號未聞以不嚴不固而為國體也能嚴且固則上自宗廟社稷下及百萬之衆可安堵矣陛下


乘輿不煩順動矣雖寇入東路不得而襲矣彼扣澶淵有割地之請可拒而弗許矣彼求決戰可戒諸將持重而勿出矣彼知京師有備大軍持重則南牧之志不得而縱足以伐其謀矣而復銳則避之困則擾之夜則驚之去則躡之因其隙而圖焉皆須京師大固然後能行其策近代戎狄為京師之禍者數四矣不可不大為之防易曰王公設險以守其國此先聖之訓非臣之所能言也惟聖鑒裁之

乞召還王洙及就遷職任事劄子

臣聞國家求治莫先於擢才臣之納忠無重於舉善臣竊見工部員外郎直龍圖閣新差知徐州王洙文詞精贍學術通博國朝典故無不練達搢紳之中未見其比

以唐之虞世南先朝之杜鎬方之不甚過也臣在中書
日洙曾求知越州時章得象以下並言朝廷每有典禮
之疑則問此人必見本末豈當許就外任遂不行所請
尋以撰成國朝會要一百五十卷蒙恩進直龍圖閣依
舊天章閣待講仍賜金紫以旌稽古之能也後以赴進
奏院筵會乃在京諸司常例得從一日之休徒以橫議
中傷例譴居外三經赦宥未蒙召還恐非聖朝棄瑕采
善之意臣近見此人來知襄州復能精勤政治庶務修
舉清簡和恕吏民樂康乃知其才內外可用自任工部
貲外郎已及六考不求磨勘直龍圖閣亦又四年未曾
遷改伏望聖慈不以人之小累而廢其大善如朝廷采
鴻儒碩學以備詢訪則斯人之選爲中外所服矧有懿

文可以發明議論潤色訓謨欲乞特賜召還儀表臺閣
儻朝廷意切生民重其外補則乞就遷近職別領大藩
使搢紳之列知稽古有勸爲善弗掩實聖政之端也臣
嘗叨近輔知無不言况襄鄧鄰封稔聞善治或不如舉
狀臣受上書詐不實之罪如朝廷擢用後犯入已賊臣
甘當同罪取進止



范文正公集卷第二十

老人星賦

明星有爛萬壽無疆

萬壽之靈三辰之英其出也表君之瑞其大也助月之
 明但仰祥光莫辨皤然之象方資睿筭斯垂耄矣之名
 皇家以大洽雍熙咸臻仁壽感垂象之不變彰御圖之
 可久爰假號於耆年寔歸美於元后南郊享處能無鼓
 缶之歌銀漢經時誰是遊河之友觀夫落落位正熒熒
 影孤應春秋之候出丙丁之隅視合璧之祥兮未異顧
 連珠之瑞兮若無象茲黃髮永我鴻圖想天上之宵征
 寧悲鍾漏顧人間之夕景豈恨桑榆是何上象著明昌
 時合偶歷數自延於人主名實何慙於國叟月輪遙覩
 安車之意寧無天駟傍瞻失馬之嗟何有此蓋君著明

德天陳瑞星會茲鼎盛薦乃椿齡增芳華於信史協休
美於祥經每觀運行如縱心於黃道無差躔次疑尚齒
於青冥足使歷象者考祥占天者改觀掛碧空而的的
度清宵而爛爛非時不見如四皓之避秦有道必居若
二疎之在漢大矣哉名尊五福位列三光發天文之炳
煥符帝德之悠長北闕前瞻獨呈祥於有爛南山俯映
共獻壽於無疆士有仰而賦曰天之象兮示勸君之位
兮善建實贊天靈之數允叶華封之願又何必周王之
夢九而嵩嶽之呼萬者也

老子猶龍賦

元聖之道
通變如此

昔老氏以觀妙虛極棲真渾元握道樞而不測譬龍德
而彌尊孰可侔珠長存慈儉之寶全疑在沼不離清淨

之源宣尼之啓述嘉言發揮至聖謂此真宗之德若彼
時乘之性每去不祥之器劍化同歸常開衆妙之門魚
登比盛莫不遺情寵辱放志希夷振淳風而騰驤有便
樂上善而游泳無礙所謂性相近也故可則而象之知
雄守雌宛訝存身之際絕聖弃智潛疑勿用之時至指
難偕元功莫極知止而過元何有善行而在田可則彼
飛昇於天路此逍遙於聖域流沙西去曾無戰野之虞
紫氣東來寔有召雲之德豈不以神龍之舉也其變不
窮聖人之道也無幽不通一則致霖雨於天下一則宣
教化於區中背僞歸真豈逐葉公之好長生久視寧資
秦氏之功不然又安得深述杳冥盛稱達變忘機而沉
梭是擬著經而負圖可見宋纖比聖堪爲折角之流尹

喜依仁自得攀髯之便大道卷舒非龍何如言豹隱者胡能比矣稱虎變者近可方諸我名蹟四大之間五靈斯會我道配二儀之際三友非疎故能作大匠之宗師闡無爲之妙旨惟導道而貴德自反古而復始比於或躍之靈蕩蕩乎其聖如此

蒙以養正賦

君子能以蒙養其正

蒙者處晦而弗曜正者居中而弗羣守晦蒙而靡失養中正而可分處下韜光允謂含章之士居上弃智斯爲抱一之君聖人以設彼易文授諸君子考其在蒙之象得此養正之理渾兮若濁下民無得而稱焉闇然而彰聖功亦在其中矣是以不伐其善罔耀其能惟樸素而是守又濬哲而曷矜故知我者謂我愚不可及不知我

者謂我智不足稱務實去華育德之方斯在反聽收視養恬之義相應故得悔吝不生純和自履隱其明而若昧保其終而如始至賢者孟子在養素而弗違亞聖者顏生性如愚而有以是知蒙正相養聖賢是崇欲求乎不失其正必在乎受之以蒙石蘊玉而外質蚌含珠而內融天地何言育物之功潛用龍蛇處蟄存身之道不窮其或謀畫爲先聰明自廣不務淳淳而處每思察察而往則彼蒙也喪乎其真此正也失其所養曷若我知白守黑老氏之教寧忘用晦而明箕子之風不爽至矣哉正之在斯養亦宜其蘊道德而不銜豈禍福之能隨志士體之而脩身素履無失聖人執之而行化赤子焉知迺有脩辭立誠窮理盡性常默默以存志將乾乾而

希聖庶幾進退之間保君子之中正

禮義爲器賦

崇禮明義
斯以爲器

禮義交舉聖賢是崇既覩化人之要爰彰爲器之功脩之於身豈晚成而是慮體之於政見日用之無窮前典可稽格言斯啓假其器而宣其教尊其義而貴其禮本於太一寧因雕琢之勞見無不爲豈定方圓之體不速而成與世作程于以致滿而不溢于以知用之則行見者之謂智述者之謂明合二美以同歸皆能致用列五常而共乂何患易盈是以化彼邦家器茲禮義其美也混而爲一其設也分而爲二助政教而可大貫古今而不墜宣尼始問於周史雅契求新晉文首定於襄王允符先利豈不以爲君之柄也非禮何持立人之道也惟

義是資居上而不我遐棄化下而何莫由斯有之則安在傾歆而莫覩聞而能徒信用捨以從宜是知彼器也利乃生民此器也歸諸君子蓋用之而可資故喻之而有以察其無體可忘尚象之言執以衛身詎有假人之耻念茲在茲無爲而爲但守執虛之戒難忘持滿之規安上治民寧使乎小人乘矣見危致命豈惟乎長子主之今國家稽古不忘宣風遐被其禮也同二儀之節其義也正四方之志覆萬國而無疆通大道之不器

今樂猶古樂賦

民康同樂
今古何異

古之樂方所以化人今之樂方亦以和民在上下之咸樂豈今昔之殊倫何後何先俱可諧於雅頌一彼一此皆能感於人神原夫惟孟子之謨猷激齊王之思慮惠

民之道將進述樂之言斯著以謂昔時搏拊實用洽於羣情此日鏗鏘亦足康於兆庶蓋在乎君臣交泰民物茲豐和氣既充於天下德華遂振於域中寔萬邦之所共諒百世之攸同聽此笙鏞曷異聞韶之美顧茲匏土宛存擊壤之風孰是孰非爰究爰度且何傷於異制但無求於獨樂移風易俗豈惟前聖之所能春誦夏絃寧止古人之有作若乃均和其用調審其音上以象一人之德下以悅萬國之心既順時而設教孰尊古而卑今六律再推自契伶倫之管五聲未泯何慙虞舜之琴其或政尚滋章民猶勞苦樂雖遵於前代化未暢於率土曷若我咸臻仁壽共樂鍾鼓八風時叙命夔而不在當年萬舞日新教胄而何須往古若然則不假求舊准聞

導和其制也雖因時而少異其音也蓋理心而靡他播茲治世之音無遠弗届較彼先王之樂相去幾何今國家大樂方隆休聲遐被曾不惑於鄭衛自能和於天地舉今古而酌中與英莖而豈異

省試自誠而明謂之性賦

誠發為德彰彼天性

聖人生稟正命動由至誠發聖德而非習本天性以惟明生而神靈實降五行之秀發於事業克宣三代之英稽中庸之有云仰上聖之莫越性以誠著德由明發其誠也感于乾坤其明也配乎日月我生既異初郁郁而有融我性在斯終存存而不竭上智不移無為而為蘊被精醇之志發為濬哲之資文王之德之純既由天啓周公之才之美亦自生知故得冠乎人倫立乎聖域所

以見至矣之性所以成自然之識究其本也蓋鍾純粹之精及其顯焉乃著文明之德豈不以自誠而明者生而非非常自明而誠者學而有方生而德者實茲睿聖學而及者惟彼賢良賴生則自明而臻謂賢人而可擬夫子則自誠而至與天道而彌彰若然則誠之道也既如此明之道也又如彼蓋殊途而同致亦相湏而成理發乎仁義遂使跂而及之著乎聖神所謂誠則明矣且夫明乃誠之表誠乃明之先存乎誠而正性既立貫乎明而盛德迺宣有感必通始料乎在心爲志不求而得終知乎受命于天大矣哉考彼格言見茲元聖施爲可觀於君德動靜必遵於天命由至誠而達至明是爲聖人之性

金在鎔賦

金在良冶
求鑄成器

天生至寶時貴良金在鎔之姿可觀從革之用將臨熠耀騰精乍躍洪鑪之內縱橫成器當隨哲匠之心觀其大冶旣陳滿籟斯在俄融融而委質忽曄曄而揚彩英華旣發雙南之價彌高鼓鑄未停百鍊之功可待况乎六府會昌我稟其剛九牧納貢我稱其良因烈火而變化逐懿範而圓方如令區別妍媸願爲軒鑑儻使削平禍亂請就干將國之寶也有如此者欲致用於君子故假手於良冶時將禁害夏王之畀可成君或好賢越相之容必寫是知金非工而弗用工非金而曷求觀此鎔金之義得乎爲政之謀君論冶焉自得化人之旨民爲金也克明從上之由彼以披沙見尋藏山是務一則求

之而未顯一則棄之而弗顧曷若動而愈出既踊躍以
求伸用之則行必周流而可鑄羨夫五行之粹三品之
英昔麗水而隱晦今躍冶而光亨流形而不縮不盈出
乎其類尚象而無小無大動則有成士有鍛鍊誠明範
圍仁義俟明君之大用感良金而自試居聖人天地之
鑪亦庶幾於國器

臨川羨魚賦

嘉魚可致
何羨之有

彼何人斯在水之湄謂嘉魚之美矣臨長川而羨之瞻
之在前殊有忘筮之意求之不得寧無結網之思徒觀
其紋浪不驚錦鱗咸遂或在藻以安性或戲荷而從類
但見嬉游固難馴致當自適於清流若有待於芳餌在
淵游泳疑莊叟之夢來依岸噉喁訝平子之書至潑潑

晴波在彼中河可以登庖爲籩豆之俎可以昇鼎俟鹽
梅之和顧絲緡而則不俯漪漣而柰何疑睇依依控鯉
之方安得含情默默思鱸之興何多惜矣空拳眷乎頌
首止疚懷而肆目自朶頤而爽口幾悔恨於庖無徒諷
詠於南有心乎愛矣愧踈破浪之能敏以求之懼速憑
河之咎烹鮮尚賒謀之未嘉弗經營於網網空顧慕於
鱗鱗非達士之識矣其愚人之意耶胡不爲施罟之功
豈勞彈鋏胡不學投竿之術自取盈車又何必其志營
營其圖瑣瑣徘徊乎水澤之畔快悵於泉源之左亦由
射雉之子即亡矢以胡爲待兔之人非設置而奚可然
則有爲者必先其器所羨者何止於魚器則可爲詎見
力不足者魚或空羨又豈得而食諸在臨事而求已將

觸類而起予五餌不陳釣四夷而莫至三綱不緝羅兆
民而則踈至如居人之常爲邦之彥欲高位而是蹈當
崇德而無倦脩天爵而人爵從之何煩健羨

水車賦

如歲大旱
汝爲霖雨

器以象制水以輪濟假一轂汲引之利爲萬頃生成之
惠揚清激濁誠運轉而有時救患分災幸周旋於當世
有以見天假之年而王無罪歲者也當其東作云布西
成以期何密雲不雨兮若焚若灼而大田多稼兮如渴
如饑耒耜之功旣至倉箱之望將危豈無陂池抱甕之
行曷濟亦有溝洫挈瓶之利胡爲乃有智者樂水而起
予梓人治材而和汝謂一溉之可洽俾百兩之斯舉固
無傷於濡軌軋軋臨川初有認於埋輪翹翹在渚是車

也匪疾匪徐彼水也突如來如補畎畝之不足損谿壑
之有餘渤潏騰波忽若刺山之泉湧潺湲去浪漸如澄
江之練舒詎見瓶羸那慙綆短流洋洋兮乍若膏潤苗
忻忻兮初如律暖載脂載牽幾通鄭國之渠弗馳弗驅
自解成湯之旱動將勢旋發與機會旣引重之象著亦
救焚之功大河水澆澆得我而不滯不疑原田萁萁用
我而無災無害仁常汲下智復鈞深于以見因民之利
于以見洗物之心若夫大禹之年應資治水必也高宗
之世亦命爲霖至如賢人在輔德施周普五日一風十
日一雨則斯車也吾猶不取



用天下心爲心賦

人主當用
天下心矣

至明在上無遠弗賔得天下爲心之要示聖王克己之

仁政必順民蕩蕩洽大同之化禮皆從俗熙熙無不獲
之人當其治國牧民代天作主敷至治於四海遂羣生
於九土以爲肆予一人之意則國必顛危伸爾萬邦之
懷則人將鼓舞於是審民之好惡察政之否臧有疾苦
必爲之去有災害必爲之防苟誠意從乎億姓則風化
行乎八荒如天聽卑兮惟大若水善下兮孰當彼懼煩
苛我則崇簡易之道彼患窮天我則脩富壽之方夫如
是則愛將衆同樂與人共德澤浹于民庶仁聲播于雅
頌通天下之志靡靡而風從盡萬物之情忻忻而日用
豈不以虛己之謂道適道之謂權下有所欲吾何可專
一應萬而誠至寡治衆而功宣堯舜則舍己從人同底
于道桀紂則以人從欲自絕於天必也重乎安危明夫

用捨弗疑滯於物我可并包於夷夏曠老氏之旨無欲
者觀道妙於域中稽夫子之文虛受者感人和於天下
若然則其化也廣其旨也深不以己欲爲欲而以衆心
爲心達彼群情侔天地之化育洞夫民隱配日月之照
臨方今穆穆虛懷巍巍恭己視以四目而明乎中外聽
以四聰而達乎遠邇噫何以致聖功之然哉從民心而
已矣



文正集卷三

